

# 宋史



## 卷之三十六



392

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
JUL 30 1936

T2455/21





本紀卷第十一

宋史十一

哈佛大學漢和  
國書館珍藏印

開府儀同三司樞密軍國事節書袁穎穆國更領經筵事都總裁臣脫脫等奉

勅修

仁宗三

慶曆元年春正月辛亥朔御大慶殿受朝己未加誦  
廝囉河西節度使壬申詔歲以春分祠高禩是月元  
昊請和二月己亥壽國公昕薨辛亥罷大宴京東西  
淮浙江南荆湖置宣毅軍甲辰詔臣僚受外任者毋  
得因臨遣祈恩丙午京師雨藥是月元昊寇渭州環  
慶路馬步軍副總管任福敗于好水川福及將佐軍



士死者六千餘人。三月庚戌朔修金隄。乙卯詔止郡國舉人勿以邊機爲名希求恩澤。夏四月甲申以資政殿學士陳執中同陝西馬步軍都總管兼經略安撫沿邊招討等使知永興軍。詔夏竦仍判永興軍。乙巳下德音降陝西囚死罪一等流以下釋之。特支軍士緡錢振撫邊民被鈔略者親屬。五月丁巳錄繫囚甲子出內藏緡錢一百萬助軍費。乙丑追封皇長子爲褒王。賜名昉。丁卯罷陝西經略安撫沿邊招討都監辛未。宋庠鄭戩罷。以王舉正叅知政事任中師任。布爲樞密副使。詔夏竦屯軍鄜州。陳執中屯軍涇州。

癸酉閱試衛士。六月壬辰詔陝西諸路總管司嚴邊備毋輒入賊界。賊至則禦之。乙巳詔近臣舉河北陝西河東知州通判縣令。秋七月丙辰月掩心後星。戊午月掩南斗。壬戌置萬勝軍。凡二十指揮。是月元昊寇麟府州。八月戊寅詔鄜延部署以兵援麟府。甲申河北置場括市戰馬緣邊七州軍免括。乙未毀潼關新置樓櫓。庚子月掩歲星。乙卯募民間材勇者補神捷指揮。是月元昊寇金明砦。破寧遠砦。砦主王世亶兵馬監押王顯歿之。陷豐州。知州王餘慶兵馬監押孫吉歿之。九月壬子命河東鑄大鐵錢。乙亥復置義



倉冬十月甲午詔罷都部署分四路置使置陝西營田務已亥罷銅符木契是月修河北城池十一月壬子置涇原路強壯弓箭手丙辰發廩粟減價以濟京城民甲子朝饗景靈宮乙丑饗太廟奉慈廟丙寅祀天地于園丘大赦改元蠲陝西來年夏稅十之二及麟府民二年賦租臣僚許立家廟功臣不限品數賜戟增天下解額弛京東八州鹽禁是月令江饒池三州鑄鐵錢十二月丙子加恩百官丁丑司天監上崇天萬年曆戊寅詔陝西四路總管及轉運使兼營田甲午置陝西護塞軍是歲湖南洞蠻知徽州楊通漢

貢方物

二年春正月丁巳復京師權鹽法壬戌詔以京西閒田處內附蕃族無親屬者遣使河北募兵及萬人者賞之癸亥詔磨勘院攷提點刑獄功罪爲三等以待黜陟二月乙未詔河北強壯刺手背爲義勇軍三月甲辰朔詔殿前指揮使兩省都知舉武臣才堪爲將者丁巳杜衍宣撫河東辛酉晁宗慤罷己巳契丹遣蕭英劉六符來致書求割地是月賜禮部奏名進士諸科及第出身八百三十九人夏四月戊寅命御史中丞諫官同較三司用度罷其不急者庚辰知制誥富



弼報使契丹五月辛亥錄繫囚壬子減皇后及宗室  
婦郊賜之半甲寅詔三館臣僚上封事及聽請對丙  
辰詔醫官毋得換右職戊午建大名府爲北京降河  
北州軍繫囚罪一等杖笞以下釋之乙丑罷左藏庫  
月進錢戊辰禁銷金爲服飾是月契丹集兵幽州聲  
言來侵河北京東皆爲邊備六月甲戌出內藏銀紬  
絹三百萬助邊費癸未以特奏名武藝人補三班丙  
戌置北平軍丙申閱蕃落將士騎射戊戌詔減省南  
郊臣僚賜與秋七月丙午任布罷丁未詔軍校戰沒  
無子孫者賜其家緡錢戊午大雨雹以呂夷簡兼判

樞密院事章得象兼樞密使晏殊加平章事癸亥富  
弼再使契丹詔京官告病者一年方聽朝叅八月丁  
丑策制舉人戊寅策武舉人試騎射甲申白氣貫北  
斗戊子出內藏庫緡錢十萬修北京行宮己亥遣使  
安撫京東督捕盜賊九月丙午呂夷簡改兼樞密使  
乙丑契丹遣耶律仁起劉六符持誓書來閏月戊戌  
罷河北民間科徭是月元昊寇定川砦涇原路馬步  
軍副都總管葛懷敏戰沒諸將死者十四人元昊大  
掠渭州而去冬十月庚戌敕陝西保捷軍甲寅遣使  
安撫涇原路丙辰知制誥梁適報使契丹戊午發定



州禁軍二萬二千人屯涇原庚申詔恤將校陣亡其妻女無依者養之宮中。丙寅契丹遣使來再致誓書報徹兵十一月壬申黑氣貫北斗柄辛巳復都部署兼招討等使命韓琦范仲淹龐籍分領之甲申以泰山處士孫復爲國子監直講是歲占城獻馴象三年春正月庚午朔封皇子曦爲鄂王辛未曦薨丙子減陝西歲市木三之一辛巳詔輔臣議蠲減天下賦役戊子詔錄將校死王事而無子孫者親屬辛卯置德順軍壬辰錄唐狄仁傑後癸巳元昊自名曩霄遣人來納款稱夏國二月丙午賜陝西招討韓琦范

仲淹龐籍錢各百萬辛酉立四門學三月壬申閱衛士武技戊子呂夷簡罷爲司徒監修國史與議軍國大事以章得象爲昭文館大學士晏殊爲集賢殿大學士並兼樞密使夏竦爲樞密使賈昌朝參知政事夏四月戊戌朔幸瓊林苑閱騎士癸卯遣保安軍判官邵良佐使元昊許封冊爲夏國主歲賜絹十萬匹茶三萬斤甲辰以韓琦范仲淹爲樞密副使乙巳詔夏竦還本鎮以杜衍爲樞密使丙辰以春夏不雨遣使祠禱于嶽瀆甲子呂夷簡罷議軍國大事五月丁卯朔日有食之庚午錄繫囚戊寅詔諸路轉運使並



兼按察使歲具官吏能否以聞庚辰祈雨于相國寺  
會靈觀癸未置御史六員置推直官丁亥置武學戊  
子雨已丑謝雨辛卯築欽天壇于禁中乙未近臣薦  
試方畧者六人授官有差是月忻州地大震虎翼卒  
王倫叛于忻州六月甲辰詔諸路漕臣令所部官吏  
條茶鹽礬及坑冶利害以聞秋七月辛未詔許一府  
不限奏事常制得敷陳畱對丙子王舉正罷壬午罷  
陝西管內營田甲申命任中帥宣撫河東范仲淹宣  
撫陝西乙酉獲王倫八月乙未朔命官詳定編敕戊  
戌詔諫官日赴內朝丁未以范仲淹叅知政事富弼

為樞密副使壬子白氣貫北斗魁癸丑韓琦代范仲  
淹宣撫陝西甲寅太白晝見戊午罷武學九月丁卯  
詔輔臣對天章閣戊辰呂夷簡以太尉致仕乙亥任  
中師罷丁丑詔執政大臣非假休不許私第受謁是  
月桂陽洞蠻寇邊湖南提刑募兵討平之冬十月丙  
午詔中書樞密同選諸路轉運使丁未詔縣令佐能  
根括編戶隱偽以增賦入者量其數賞之戊申詔二  
府同選諸路提刑甲寅復諸路轉運判官乙卯詔脩  
兵書壬戌詔二府頒新定磨勘式甲子築水洛城是  
月光化軍亂討平之十一月丙寅上清宮火癸未詔



館職有闕以兩府兩省保舉然後召試補用丁亥更  
蔭補法壬辰限職田是月五星皆在東方十二月乙  
巳桂陽監徭賊復寇邊丁巳大雨雪木冰河北雨赤  
雪交趾獻馴象五安化州蠻來貢

四年春正月庚午京城雪寒詔三司減價出薪米以  
濟之壬申西蕃磨羶角入貢乙亥荆王元儼薨辛卯  
太常禮儀院上新脩禮書及慶曆祀儀二月丙申出  
奉宸庫銀三萬兩振陝西饑民己酉白虹貫日甲寅  
罷陝西四路馬步軍都總管經略安撫招討使復置  
隨路都總管經略安撫招討使三月癸亥朔以旱遣

內侍祈雨辛未省廣濟河歲漕軍儲二十萬石乙亥  
詔天下州縣立學更定科舉法語在選舉志己卯出  
御書治道三十五事賜講讀官庚辰錄唐郭子儀後  
甲申免衡道州桂陽監民經徭賊劫略者賦役一年夏  
四月丙申詔湖南民誤為征徭軍所殺者賜帛存撫  
其家丁酉宜州蠻歐希範叛詔廣西轉運鈐轄司發  
兵討捕壬子以錫慶院為太學五月庚午錄繫囚壬  
申幸國子監謁孔子有司言舊儀止肅揖帝特再拜  
賜直講孫復五品服遂幸武成王廟又幸玉津園觀  
種稻乙亥撫州獻生金山丙子詔西川知州軍監罷



任未出界而卒者錄其子孫一人戊寅詔募人納粟振淮南饑乙酉忻州言地震有聲如雷丙戌曩霄遣人來復稱臣六月壬子降天下繫囚流徒罪一等杖笞釋之范仲淹宣撫陝西河東癸丑詔諸軍因戰傷廢停不能自存及死事之家孤老月給米人三斗秋七月戊寅封宗室德文等十人為郡王國公壬午月犯焚惑癸未契丹遣使來告伐夏國甲申夷人寇三江砦消井監官兵擊走之丙戌詔諸路轉運提刑察舉守令有治狀者八月辛卯命賈昌朝領天下農田范仲淹領刑法事甲午富弼宣撫河北戊戌命右正

言余靖報使契丹保州雲翼軍殺官吏據城叛庚子命右正言田况度視保州仍聽便宜行事丙午進宗室官有差戊午詔輔臣所薦官毋以為諫官御史九月辛酉保州平壬戌詔保州官吏死亂兵而無親屬者官為殯斂兵官被害及戰沒並優賜其家民田遭蹂踐者蠲其租癸亥以真宗賢妃沈氏為德妃婉儀杜氏為賢妃戊辰呂夷簡薨庚午晏殊罷乙亥遣使安撫湖南甲申以杜衍同中書門下平章事兼樞密使雋賢殿大學士賈昌朝為樞密使陳執中叅知政事丁亥宴宗室太清樓射于苑中冬十月庚寅賜曩



霄誓詔歲賜銀絹茶絲凡二十五萬五千陳堯佐慶  
丙申命范仲淹提舉三館祕閣繕校書籍癸丑桂陽  
蠻降授蠻酋三人奉職十一月壬戌以西界內附香  
布為團練使己巳詔戒朋黨相訐及按察恣為苛刻  
文人肆言行恠者己卯改上莊穆皇后謚曰章穆莊  
獻明肅皇太后曰章獻明肅莊懿皇太后曰章懿莊  
懷皇后曰章懷莊惠皇太后曰章惠庚辰朝饗景靈  
宮辛巳饗太廟奉慈廟壬午冬至祀天地于圜丘大  
赦十二月壬辰加息百官乙未封曩霄為夏國主丁  
酉詔州縣以先帝所賜七條相誨敕辛亥置保安鎮

戎軍權場是歲黎州邛部川山前山後百蠻都鬼主  
牟黑來貢

五年春正月甲戌罷河東陝西諸路招討使乙亥復  
置言事御史丙子契丹遣使來告伐夏國還庚辰命  
知制誥余靖報使契丹癸未詔京朝官因被彈奏雖  
不曾責罰但有改移差遣並四周年磨勘乙酉范仲  
淹富弼罷丙戌杜衍罷以賈昌朝同中書門下平章  
事兼樞密使集賢殿大學士王貽永為樞密使宋庠  
參知政事吳育龐籍並為樞密副使二月辛卯詔罷  
京朝官用保任叙遷法又罷蔭補限年法壬辰曩霄



初遣人來賀正旦癸卯以久旱詔州縣毋得淹繫刑  
獄辛亥祈雨于相國天清寺會靈祥源觀癸丑桂陽  
監言唐和等復內寇乙卯謝雨三月己未詔太宗正  
勵諸宗子授經務學辛酉韓琦罷癸亥詔禮部貢舉  
甲子宜州蠻賊歐希範平庚午東方有黃氣如虹貫  
月甲戌詔監司按察屬吏毋得差官體量甲申詔陝  
西以曩霄稱臣降繫囚罪一等答釋之邊兵第賜緡  
錢民去年逋負皆勿責蠲其租稅之半麟府州嘗為  
羌所掠除逋負租稅如之丙戌罷入粟補官夏四月  
丁亥朔司天言日當食陰晦不見錄繫囚遣官錄三

京囚辛卯曩霄初遣人來賀乾元節戊申章得象罷  
以賈昌朝為昭文館大學士陳執中同中書門下平  
章事集賢殿大學士兼樞密使庚戌以吳育叅知政  
事丁度為樞密副使五月己巳罷諸路轉運判官閏  
月丙午曩霄遣人來謝冊命六月丁卯減益梓州上  
供絹歲三之一紅錦鹿胎半之秋七月戊申以廣州  
地震八月庚午荆南府岳州地震九月庚寅詔文武  
官已致仕而舉官犯罪當連坐者除之辛卯以重陽  
曲宴近臣宗室于太清樓遂射苑中冬十月乙卯契  
丹遣使來獻九龍車及所獲夏國羊馬辛酉祔章獻



明肅皇后章懿皇后神主于太廟大赦罷轉運使兼  
按察庚午辛瓊林苑遂畋楊村遣使以所獲馳薦太  
廟召父老賜以飲食茶帛辛未頒曆于夏國庚辰罷  
宰臣兼樞密使十一月丁亥冬至宴宗室于崇政殿  
巳酉詔河北長吏舉殿直供奉官有武才者是歲施  
州溪洞蠻西南夷龍以特來貢

六年春正月戊申徙廣南戍兵善地以避瘴毒二月  
戊寅青州地震詔陝西經略安撫及轉運司議裁節  
諸費及所置官員無用者以聞三月辛巳朔日有食  
之錄繫囚庚寅登州地震岬嶼山摧自是屢震輒海

底有聲如雷甲午月犯歲星是月賜禮部奏名進士  
諸科及第出身八百五十三人夏四月甲寅遣使賜  
湖南戍兵方藥五月甲申京師雨雹地震丙戌錄繫  
囚戊子減邛州鹽井歲課緡錢一百萬丙申詔陝西  
市蕃部馬丁酉京東人劉沔劉沔胡信謀反伏誅六  
月庚戌朔詔夏竦與河北監司察帥臣長吏之不職  
者丁巳有流星出營室南其光燭地隱然有聲丙寅  
以久旱民多暍死命京城增鑿井三百九十丁丑詔  
制科隨禮部貢舉秋七月丁亥月犯南斗庚寅河東  
經略司言雨壞忻代等州城壁八月癸亥策試賢良



方正能直言極諫并試武舉人癸酉以吳育爲樞密副使丁度叅知政事九月甲辰登州言有巨木三千餘浮海而出冬十月辛未詔發兵討湖南徭賊十一月巳卯遣官議夏國公封界癸未湖南徭賊寇英韶州界辛丑畋東韓村乘輿所過及園內田蠲其租一年是歲邈川首領喃廝囉西蕃瞎羶磨羶角安化州蠻蒙光速等來貢交趾獻馴象十道州部瀧酋李石壁等降

七年春正月丙子朔御大慶殿受朝丁亥詔河北所括馬死者限二年償之巳亥頒慶曆編敕壬寅詔減連州民被徭害者來年夏租二月巳酉詔取益州交子三十萬於秦州募人入中糧丙辰令內侍二人提舉月給軍糧三月壬午錄繫囚癸未詔天下有能言寬恤民力之事者有司驛置以聞以其副上之轉運司詳其可行者輒行之毀後苑龍船丁亥以旱罷大宴癸巳詔避正殿減常膳許中外臣僚實封條上三事乙未賈昌朝罷以陳執中爲昭文館大學士夏竦同中書門下平章事集賢殿大學士吳育爲給事中歸班文彥博爲樞密副使罷出獵丁酉以夏竦爲樞密使文彥博叅知政事高若訥爲樞密副使辛丑祈



兩于西太一宮及還遂兩壬寅陳執中宋庠丁度以  
旱降官一等夏四月丁未謝雨己酉詔前京東轉運  
使薛紳專任文吏伺察郡縣細過江東轉運使楊紘  
判官王綽提點刑獄王鼎苛刻相尚並削職知州自  
今毋復用爲部使者壬子御正殿復常膳乙卯復執  
中庠度官己巳詔諫官非公事毋得私謁五月戊寅  
詔武臣非歷知州軍無過者毋授同提點刑獄己丑  
補降徭唐和等爲峒主己亥命翰林學士楊察蠲放  
天下逋負辛丑詔面北二邊有大事二府與兩制以  
上雜議之六月乙巳詔禁畜猛獸害人者辛酉詔天

下知縣非鞫獄毋得差遣壬戌詔臣僚朝見者留京  
毋過十日秋七月癸未奉安太祖太宗真宗御容于  
南京鴻慶宮甲申德音降南京畿內囚罪一等徒以  
下釋之賜民夏稅之半除災傷倚閣稅及欠折官物  
非侵盜者辛丑禁貢餘物饋近臣八月乙丑析河北  
爲四路各置都總管九月丁酉詔剛定一州一縣敕  
冬十月壬子李迪薨甲子幸廣親宅謁太祖太宗神  
御殿宴宗室賜器幣有差乙丑河陽許州地震十一  
月乙未加上真宗謚丙申朝饗景靈宮丁酉饗太廟  
奉慈廟戊戌冬至祀天地于圜丘太赦貝州宣毅卒



王則據城及十二月戊申加恩百官庚戌樞密直學士明鎬體量安撫河北癸丑詔具州有能引致官兵獲賊者授諸衛上將軍甲寅遣內侍以敕榜招安具賊是歲西蕃磨罔角來貢

八年春正月丁丑文彥博宣撫河北明鎬副之壬午江寧府火乙未日赤無光閏月辛丑貝州平甲辰曲赦河北賜平貝州將士緡錢戰沒者官為塋祭兵所踐民田蠲其稅改貝州為息州戊申文彥博同中書門下平章事集賢殿大學士官吏將士有功者遷擢有差辛酉親從官顏秀等四人夜入禁中謀為變宿衛

兵捕殺之丙寅磔王則于都市丁卯知貝州張得一坐降賊伏誅二月癸酉頒慶曆善救方夏國來告曩霄卒已卯賜瀛莫恩冀州緡錢二萬贖還饑民鬻子丁酉奉安宣祖太祖太宗御容于睦親宅三月甲辰詔禮部貢舉辛亥遣使體量安撫陝西甲寅幸龍圖天章閣詔輔臣曰西陲備禦兵冗賞濫罔知所從卿等各以所見條奏又詔翰林學士三司使知開封府御史中丞曰朕躬闕失左右朋邪中外險詐州郡暴虐法令有不便於民者朕欲聞之其悉以陳壬戌以霖雨錄繫囚癸亥以朝政得失兵農要務邊防備豫



將帥能否財賦利害錢法是非與夫讒人害政姦盜  
亂俗乃防微杜漸之策召知制誥諫官御史等諭之  
使悉對于篇夏四月己巳朔封曩霄子諒祚為夏國  
主壬申丁度罷明鎬叅知政事五月辛酉夏竦罷宋  
庠為樞密使龐籍叅知政事六月戊辰朔詔近臣舉  
文武官材堪將帥者丙子河決澶州商胡埽壬辰以  
久雨齋禱甲午明鎬卒乙未詔館閣官須親民一任  
方許入省府及轉運提點刑獄差遣丙申章得象薨  
秋七月戊戌以河北水令州縣募饑民為軍辛丑罷  
鑄鐵錢八月己丑以河北京東西水災罷秋宴九月

戊午詔三司以今年江淮漕米轉給河北州軍冬十  
一月己亥作皇帝欽崇國祀之寶壬戌出廩米減價  
以濟畿內貧民十二月乙丑朔以霖雨為災頒德音  
改明年元減天下囚罪一等徒以下釋之出內藏錢  
帛賜三司買粟以濟河北流民所過官為舍止之所  
賫物毋收筭丁卯冊夷人張氏為貴妃戊子遣使體  
量安撫利州路是歲廬州合肥縣稻再實交州來貢  
皇祐元年春正月甲戌朔日有食之以河北水災罷  
上元張燈停作樂庚戌張士遜薨己未詔以緡錢二  
十萬市穀種分給河北貧民辛酉詔臺諫非朝廷得



失民間利病毋風聞彈奏二月戊辰以河北疫遣使  
頒藥辛未發禁軍十指揮赴京東西路備盜三月丁  
巳錄繫囚巳未契丹遣使來告伐夏國庚申翰林院  
學士錢明逸報使契丹是月賜禮部奏名進士諸科  
及第出身千三百九人四月癸未梓州轉運司言涪  
井監夷人平六月甲子蠲河北復業民租賦二年甲  
戌如置觀文殿大學士戊寅詔中書樞密非聚議毋  
通賓客戊子詔轉運使提點刑獄所部官吏受贓失  
覺察者降黜秋七月丁酉詔臣僚毋得保薦要近內  
臣巳未詔諸州歲市藥以療民疾八月壬戌陳執中  
罷以文彥博為昭文館大學士宋庠同中書門下平  
章事集賢殿大學士龐籍為樞密使高若訥叅知政  
事梁適為樞密副使甲申策制舉武舉人九月乙巳  
廣源州蠻儂智高寇邕州詔江南福建等路發兵以  
備戊午太白犯南斗巳未罷武舉冬十一月丙申詔  
河北被災民八十以上及篤疾不能自存者人賜米  
一石酒一斗辛丑詔民有冤貧不能詣闕者聽訴於  
監司以聞十二月甲子遣入內供奉高懷政督捕邕  
州盜賊是歲大留國來貢



本紀卷第十一

本紀卷第十二

宋史十二

開府儀同三司上柱國錄軍國軍事前書右丞相兼修國史領經筵事都總裁臣脫脫等奉

勅修

仁宗四

二年春正月癸卯以歲饑罷上元觀燈壬子命近臣同三司較天下財賦出入之數二月甲申出內庫絹五十萬下河北陝西河東路以備軍賞三月戊子朔詔季秋有事于明堂己丑以大慶殿為明堂甲午遣官祈雨丁酉月犯軒轅大星戊戌詔明堂禮成群臣毋上尊號庚子契丹遣使以伐夏師還來告丙午雨

嘉靖丙辰年

宋史本紀卷十二

監生陳嘉汀刑



巳酉詔兩浙流民聽人收養翰林學士趙槩報使契  
丹夏五月丁亥朔新作明堂禮神玉巳亥旌定州義  
民李能六月巳未出新製明堂樂八曲丁卯以自製  
黃鐘五音五曲並肄于太常庚午定選舉縣令法壬  
申月犯填星癸未錄繫囚熒惑入輿鬼犯積尸癸亥  
出內藏絹百萬市糴軍儲壬申深州大雨壞廬舍九  
月丁亥閱雅樂巳酉朝饗景靈宮庚戌饗太廟辛  
亥大饗天地于明堂以太祖太宗真宗配如圜立大  
赦百官進秩一等詔自今內降指揮百司執奏毋輒  
行敢因緣干請者諫官御史察舉之冬十月庚午熒

惑犯太微上將乙亥宴京畿父老于錫慶院閏十一  
月巳未詔后妃之家毋得除二府職任丙寅秀州  
地震有聲如雷丁卯詔中書門下省兩制及太常官  
詳定太樂河北水詔蠲民租出內藏錢四十萬緡絹  
四十萬匹付本路使措置是歲芻糧十二月甲申  
定三品以上家廟制喃廝囉西蕃瞎羶西南蕃龍  
光胤占城沙州來貢涇原路生戶都首領那龍男  
阿日丁內附

三年春正月乙丑幸魏國大長公主第視疾二月丙  
戌宰臣文彥博等進皇祐大饗食明堂記巳亥復行



河北沁邊州軍入中糧草見錢法三月庚申宋庠罷以劉沆參知政事癸酉儂智高表獻馴象及金銀卻之夏四月癸未詔河北流民相屬吏不加恤而乃飾厨傳交賂使客以取名譽自今非犒設兵校其一切禁之丙申太白晝見五月庚戌以恩冀州旱詔長吏決繫囚壬申置河渠司乙亥頒簡要濟衆方命州縣長吏按方劑以救民疾丁丑錄繫囚六月丁亥無為軍獻芝草帝命姑免知軍茹孝標罪戒州郡自今勿復獻秋七月癸丑詔少卿監以下年七十不任釐務者御史臺審官院以聞嘗任館閣臺諫及提刑

者中書裁處待制以上能自引年則優加恩禮丙辰以孔氏子孫復知仙源縣事丁巳兩制禮官上大樂名曰太安辛酉河決大名府郭固口乙丑罷徙州縣長吏不任事者十有六人丙子減郴永州桂陽監丁身米歲十萬餘石八月丙戌遣使安撫京東淮南兩浙荆湖江南饑民辛卯詔諸路監司具所部長吏治狀能否以聞是月汴河絕流冬十月庚子文彥博罷以龐籍同中書門下平章事昭文館大學士高若訥為樞密使梁適參知政事王堯臣為樞密副使十一月辛亥減漳州泉州興化軍丁米十二月



庚辰新作渾儀庚子詔文武官七十以上未致仕者  
更不考課遷官甲辰罷災傷州軍貢物是歲涇原樊  
家族密廝歌內附

四年春正月己巳詔諸路貸民種乙亥塞大名府決  
河二月庚子蠲湖州民所貸官米三月己酉詔禮部  
貢舉丙辰蠲江南路民所貸種數十萬斛辛酉錄繫  
囚辛未詔官禁市物給實直非所闕者毋市夏四月  
庚辰詔修河兵夫逃亡死傷會其數以議官吏之罰  
廣涼州蠻儂智高反五月乙巳朔智高陷邕州遂  
陷橫貴等八州圍廣州壬申命知桂州陳曙率兵討

智高六月乙亥起前衛尉卿余靖為祕書監湖南安  
撫使知潭州前尚書屯田員外郎直史館楊旼體量  
安撫廣南提舉經制盜賊事庚辰改余靖為廣西安  
撫使知桂州命同提點廣東刑獄李樞與陳曙討智  
高廣東轉運鈐轄司發兵援之丁亥以狄青為樞密  
副使秋七月乙巳出內藏錢絹助河北軍儲丙午命  
余靖經制廣南盜賊事丁巳大風拔木壬戌智高引  
衆去廣州廣東兵馬鈐轄張忠知英州蘇緘邀擊于  
白田忠戰歿甲子廣東兵馬鈐轄蔣偕又敗于路田  
八月癸未詔開封府比大風雨民廬摧圮壓死者官



爲祭歛之辛卯命樞密直學士孫沔安撫湖南江西  
內侍押班石全斌副之九月丁巳命余靖提舉廣南  
兵甲經制賊盜事庚申廣西兵馬鈐轄王正倫討智  
高于昭州館門驛戰沒智高入昭州庚午以狄青爲  
宣徽南院使宣撫荆湖路提舉廣南經制賊盜事是  
月智高襲殺蔣偕于太平場冬十月丙子太白犯南  
斗詔鄜延環慶涇原路擇蕃落廣銳軍各五十人赴  
廣南行營丁丑智高入賓州甲申復入邕州丁亥以  
諸路飢疫并征徭科調之煩令轉運使提點刑獄親  
民官條陳救恤之術以聞十一月壬寅朔日有食之

戊午詔免江西湖南廣南民供軍須者今年秋租十  
之三十二月壬申朔廣西兵馬鈐轄陳曙討智高  
兵戰于金城驛壬辰觀新樂乙未錄唐顏真卿後是  
歲河北路及鄜州水蠲河北民積年逋負鄜州民稅  
役

五年春正月壬寅朔御大慶殿受朝庚戌以廣南用  
兵罷上元張燈白虹貫日丁巳會靈觀火戊午狄青  
敗智高于邕州斬首五千餘級智高遁去甲子遣使  
撫問廣南將校賜軍士緡錢二月癸未狄青復爲樞  
密副使甲申赦廣南凡戰歿者給槨櫛護送還家無



主者葬祭之賊所過郡縣免其田租一年死事家科徭二年貢舉人免解至禮部不預奏名者亦以名聞丙戌詔廣西都監蕭注等追捕智高丁亥下德音減江西湖南繫囚罪一等徒以下釋之丁壯饋運廣南軍須者減夏稅之半仍免差徭一年戊子詔百官遇南郊奏薦無子孫者聽奏耆親一人乙未詔宗室通經者大宗正司以聞三月癸亥遣使奉安太祖御容于滁州太宗御容于并州真宗御容于澶州是月賜禮部奏名進士諸科及笈弟出身千四十二人夏四月甲午命劉沆梁適監議六樂五月乙巳詔

輔臣凡有大政許復對後殿高若訥罷以狄青爲樞密使丁未孫沔爲樞密副使戊申詔轉運使毋取羨餘以助三司庚戌詔智高所至州無城壘若兵力不敵而棄城者奏裁壬子錄繫囚丁巳詔轉運司振邕州貧民戶貸米一石甲子詔諫官御史毋挾私以中善良及臣僚言機密事毋得漏泄六月乙亥御紫宸殿按太安樂觀宗廟祭器丙戌作集禧觀成乙未詔河北荐饑轉運使察州縣長吏能招輯勞來者上其狀不稱職者舉劾之秋七月乙巳詔荆湖北路民因災傷所貸常平倉米免償己酉詔薦舉



非其人者令御史臺彈奏見任監司以上弗許薦  
論戊午詔太常定謚毋爲溢美閏月戊辰詔廣南  
民逃未還者限一年歸業其復三歲壬申龐籍罷  
以陳執中同中書門下平章事昭文館大學士丞  
同中書門下平章事集賢殿大學士乙亥詔武臣  
知州軍須與僚屬參議公事毋專決庚辰秦鳳路  
言總管劉煥等破蕃部斬首二千餘級八月丁酉朔  
詔民訴災傷而監司不受者聽州軍以狀聞辛酉策  
制舉武舉人壬戌詔南郊以太祖太宗真宗並配九  
月乙酉觀新樂冬十月內申朔日有食之壬子作

鎮國神寶丁巳詔以蝗旱令監司諭親民官上民間  
利害十一月丁卯朝饗景靈宮戊辰饗太廟奉慈廟  
巳巳祀天地于園丘大赦丁丑加恩百官戊子放天  
下逋負十二月戊午詔轉運官毋得進羨餘壬戌以  
曹陳許鄭滑州爲輔郡隸畿內置京畿轉運使是歲  
占城國來貢

至和元年春正月辛未詔京師大寒民多凍餒死者  
有司其瘞理之壬申碎通天犀和藥以療民疫癸酉  
貴妃張氏薨輟視朝七日禁京城樂一月丁丑追冊爲  
皇后賜謚温成辛卯錄繫囚減二京輔郡雜犯死



罪一等徒以下釋之二月庚子詔治河堤民有疫死者蠲戶稅一年無戶稅者給其家錢三千壬戌孫沔罷以田況爲樞密副使三月己巳王貽永罷以王德用爲樞密使辛未命曾公亮等同試入內醫官壬申賜邊臣攻守圖置京畿提點刑獄乙亥太史言日當食四月朔庚辰下德音改元減死罪一等流以下釋之癸未易服避正殿減常膳乙酉詔京西民饑宜令所在勸富人納粟以振之夏四月甲午朔日有食之用牲于社辛丑御正殿復常膳祥源觀火五月戊寅以河北流民稍復遣使安撫壬辰太白晝見

秋七月丁卯以程戡參知政事立溫成園戊辰梁適罷己巳出御史馬遵呂景初吳中復八月丁酉詔前代帝王後嘗仕本朝官八品以下其祖父母妻子犯流以下罪聽贖未仕而嘗受朝廷賜者所犯非兇惡亦聽贖丙午以劉沅同中書門下平章事集賢殿大學士命脩起居注官侍經筵九月乙亥契丹遣使來告夏國平辛巳遣三司使王拱辰報使契丹己丑太白晝見冬十月辛卯朔太白晝見壬辰詔士庶家母得以嘗傭顧之人爲姻違者離之丁酉葬溫成皇后丙午溫成皇后神主入廟戊午幸城北砲



場觀發砲宴從臣賜衛士緡錢十一月甲子出太廟  
禘祫時饗及温成皇后樂章隸于太常十二月丙午  
詔司天監天文算術官毋得出入臣僚家癸丑詔內  
侍傳宣令都知司劄報被旨者覆奏是歲融州大丘  
洞楊光朝內附

二年春正月丁卯奉安真宗御容于萬壽觀減畿  
內輔郡囚罪一等徒以下釋之賜諸軍緡錢戊辰  
邕州言蘇茂州蠻內寇詔廣西發兵討之丁亥晏  
殊薨二月壬辰汾州團練推官郭固上車戰法既  
試之授衛尉丞三月丁卯詔脩起居注立於講讀

官之次丙子封孔子後為衍聖公是月以旱除畿內  
民逋芻及去年秋逋稅罷營繕諸役夏四月己亥  
契丹遣使賀乾元節以其主之命持本國三世畫  
像來求御容辛亥定差衙前法乙卯出米京城門  
下其價以濟流民五月己未錄繫囚辛酉詔中書  
公事並用祖宗故事戊寅詔戒百官務飭官守六  
月戊戌陳執中罷以文彥博同中書門下平章事  
昭文館大學士劉沆監修國史富弼同中書門下  
平章事集賢殿大學士乙巳儂智高母儂氏弟  
智光子繼宗繼封伏誅秋八月戊子減畿內輔郡囚



罪一等徒以下釋之乙未置臺諫章奏簿壬子  
詔中書樞密院第宗姓服屬自明堂覃恩後及  
十年者咸與進官九月戊午契丹使來告其國主  
宗真殂帝為發哀成服于內東門幕次遣使祭  
奠弔慰及賀其子洪基立戊辰詔試醫官須引  
醫經本草以對每試十道以六通為合格辛巳罷  
輔臣宣徽節度使乾元節任子恩冬十月丙戌錄唐  
長孫無忌後已丑詔京畿毋領輔郡罷京畿轉運  
使提點刑獄癸丑下溪州蠻彭仕羲內寇詔湖北  
路發兵捕之十一月乙卯交趾來告李德政卒其

子曰尊上德政遺貢物及馴象已未行並邊見錢  
和糴法十二月丁亥修六塔河丁酉詔武臣有賊濫  
者毋得轉橫行其立戰功者許之庚子契丹遣使  
致其主宗真遺留物及謝弔祭庚戌太白晝見  
壬子作醴泉觀成是歲西界阿訛等內附詔遣還  
龍賜州彭師黨以其族來歸大食國西蕃安化州  
蠻來貢

嘉祐元年春正月甲寅朔御大慶殿受朝是日  
不豫辛酉輔臣禱祠于大慶殿齋宿殿廡近臣  
禱于寺觀及遣諸州長吏禱于嶽瀆諸祠壬戌



御崇政殿癸亥賜在京諸軍緡錢甲子赦天下蠲被災田租及倚閣稅戊辰罷上元張燈辛未命輔臣禱天地宗廟社稷是月大雨雪木冰二月甲辰帝疾愈御延和殿三月丁巳詔禮部貢舉辛未司天監言自至和元年五月客星晨出東方守天關至是沒壬申遣官謝天地宗廟社稷寺觀諸祠癸酉契丹遣使來謝閏月癸未朔以王堯臣參知政事程戡爲樞密副使詔前後殿間日視事夏四月壬子朔六塔河復決丙辰裁定補蔭選舉法甲戌錄繫囚是月大雨水注安上門門關折壞官私廬舍數萬區

諸路言江河決溢河北尤甚六月辛亥朔詔雙日不御殿伏終如舊辛未免畿內京東西河北被水民賦租乙亥雨壞太社太稷壇戊寅遣使安撫河北巳卯詔羣臣實封言時政闕失秋七月乙酉命京東西湖北監司分行水災州軍振饑蠲租丙戌賜河北流民米壓溺死者賜其家錢有差巳丑出內藏銀絹三十萬振貸河北月入南斗乙巳貸被水災民麥種是月彗出紫微垣長丈餘環州小遇族叛知州張揆破降之八月庚戌朔日有食之癸亥狄青罷以韓琦爲樞密使是夕彗滅甲子出恭謝樂章



肆于太常乙亥朝謁景靈宮減京城繫囚徒罪  
一等杖笞釋之戊寅詔湖北招安彭仕義九月  
庚寅命宰臣攝事于太廟辛卯恭謝天地於大  
慶殿大赦改元丁酉加恩百官庚子賜致仕卿  
監以上及曾任近侍之臣粟帛酒饌癸卯舉行  
御史遷次格自京至泗州置汴河木岸十一月  
辛巳王德用罷賈昌朝爲樞密使十二月壬子劉  
沅罷以曾公亮參知政事甲子白虹貫日是歲西  
蕃磨罔角占城大食國來貢融桂州蠻楊克端等  
內附

二年春二月巳酉梓夔路三里村夷人寇滑并監  
庚戌錄繫囚降罪一等徒以下釋之遣使錄三京  
輔郡繫囚壬戌杜衍薨澧州羅城洞蠻內寇發兵  
擊走之癸酉王德用卒是月雄霸州地震三月戊  
寅振河北被災民乙未契丹使耶律防陳覬來求  
御容戊戌淮水溢遣張昇報使契丹癸卯狄青卒  
是月賜禮部奏名進士諸科及第出身八百七十  
七人親試舉人免黜落始此夏四月巳未以河北  
地數震遣使安撫丙寅幽烟地大震壞城郭覆  
壓死者數萬人巳巳邕州火峒蠻儂宗旦入寇



癸酉以彭仕義未降遣官安撫湖北五月庚辰  
管勾麟府軍馬公事郭恩爲夏人所襲歿于斷  
道塢。己亥詔舉行磨勘法六月戊午夏國主諒  
祚遣人來謝使弔祭戊辰以淑妃苗氏爲賢妃  
秋七月辛巳詔河北諸道總管分遣兵官教閱  
所部軍辛卯命孫林張昇磨勘轉運使及提點  
刑獄課績丁酉詔陝西河北諸路經略安撫舉文  
武官材堪將領者各一人八月己酉詔每歲賜諸  
道節鎮諸州錢有差命長吏選官和藥以救民  
疾壬子命富弼等詳定編勅庚申錄繫囚降罪

一等待徒以下釋之癸亥策制舉人丁卯置庶惠倉  
九月庚子契丹再使蕭扈吳湛來求御容冬十  
月乙巳遣胡宿報使契丹丙午班祿令十一月丙  
申詔三司使體量判官才否以聞十二月戊申詔  
自今間歲貢舉天下進士諸科解舊額之半置  
明經科罷說書舉人辛亥立內降閔白二府法是  
歲西蕃瞎躡并諸族西平州黔南道王石自品西  
南蕃鷓州來貢

三年春正月戊戌鑿永通河二月癸卯契丹使來  
告其祖母哀輟視朝七日遣使祭奠弔慰癸丑



錄繫囚降罪一等徒以下釋之三月甲戌詔禮部貢  
舉夏四月甲子吳育卒乙丑罷睦親宅祖宗神御  
殿丙辰詔守令或貪恣老昏以弛爲寬以苛爲察  
以增賦歛爲勞以出入刑罰爲能而部使者莫之舉  
劾自今其各思率職毋撓權倖毋縱有罪以稱朕  
意五月壬申增國子監生員甲午契丹遣使致其  
祖母遺留物六月丙午文彥博賈昌朝罷以富弼  
爲昭文館大學士韓琦同中書門下平章事集  
賢殿大學士宋庠田况爲樞密使張昇爲樞密  
副使甲寅詔學士院編國朝制誥丁卯交趾貢異

獸秋七月丙子詔廣濟河溢原武縣河決遣官行  
視民田振恤被水害者癸巳以夔州路旱遣使安  
撫八月己亥朔日有食之己未王堯臣卒庚申彭  
仕義率衆降九月癸酉議罷榷茶法己丑契丹  
遣使來謝冬十月癸亥除河北坊郭客戶乾食鹽  
錢十一月癸酉議減冗費己丑置都水監罷三司  
河渠司十二月己巳詔三司歲上天下稅賦之數  
三歲一會虧贏以聞閏月丁卯朔詔吏人及伎術  
官職毋得任知州軍提點刑獄自軍班出至正任  
者方得知邊要州軍丁丑詔裁定制科及進士高



第人恩數庚辰詔明年正旦日食其自丁亥避正殿減常膳宴契丹使毋作樂壬午錄繫囚降三京囚罪一等徒以下釋之是歲安化上中下州北遐鎮蠻人來貢

四年春正月丙申朔日有食之用牲于社辛丑御正殿復常膳以自冬雨雪不止遣官分行京城賜孤窮老疾錢畿縣委令佐爲糜粥濟飢壬寅賜在京諸軍班緡錢頒嘉祐驛令二月巳巳罷榷茶庚午廣南言交阯寇欽州乙亥以廣惠倉隸司農寺戊子白虹貫日三月戊戌

命近臣同三司減定民間科率是月賜進士諸科及第出身三百三十九人夏四月丁卯詔孟冬大禘于太廟癸酉封柴氏後爲崇義公給田十頃奉周室祀丙子復銀臺司封駁制癸未陳執中薨辛卯詔中外臣庶居室器用冠服妾媵有違常制必罰毋貸壬辰錄繫囚降罪一等徒以下釋之大震電兩雹五月戊戌詔兩制臣僚舊制不許詣執政私第所舉薦不得用爲御史今除其法庚子詔內臣員多權罷進養子入內壬子遣官經界河北牧地餘募民種藝六月巳巳群



臣請加尊號曰大仁至治表五上不許癸酉詔諸路  
經略安撫轉運使提點刑獄各舉本部官有行實  
政事者三人以備升擢嘗任兩府者許舉內外官  
丁丑詔轉運司比隣州饑而輒閉糶者以違制論  
辛卯放宮女二百十四人秋七月丁未放宮女二百  
三十六人八月乙亥策制舉人冬十月壬申朝饗  
景靈宮癸酉大裕于太廟大赦詔諸路監司察士  
有學行爲鄉里所推者同長吏以聞民父母年八  
十以上復其一丁復益州爲成都府并州爲太原  
府戊寅加恩百官十一月庚子汝南郡王允讓薨  
十二月丁丑白虹貫日是歲喃廝囉來貢

五年春正月辛卯朔白虹貫日太白犯歲星己亥  
錄劉繼元後二月壬戌錄繫囚三月壬辰詔禮部貢  
舉癸巳劉沆薨乙未歲星書見壬子詔以蝗澇  
相仍敕轉運使提點刑獄督州縣振濟仍察不  
稱職者夏四月癸未程戡罷以孫抃爲樞密副  
使丙戌命近臣同三司議均稅五月戊子朔京師  
民疫選醫給藥以療之己丑京師地震丁酉詔  
三司置寬恤民力司己酉王安石召入爲三司度支  
判官丁巳錄繫囚降罪一等徒以下釋之六月乙丑



詔戒上封告訐人罪。或言赦前事及言事官彈劾小過不關政體者。乙亥遣官分行天下訪寬恤民力事。秋七月癸巳邕州言交趾與甲峒蠻合兵寇邊。都巡檢宋士堯拒戰死之。詔發諸州兵討捕。丙申詔待制臺諫官正刺史以上各舉諸司使至三班使臣堪將領及行陣戰鬪者三人。戊戌翰林學士歐陽脩上新修唐書。庚戌詔中下門下采端實之士明進諸朝辨激巧偽者放黜之。八月壬申詔求逸書。庚辰置陝西估馬司。乙酉罷諸路同提點刑獄使臣丙戌置江湖閩廣四川十一路轉

運判官。九月己丑太白晝見。冬十月乙酉深州言野蠶成繭。被于原野。十一月辛卯罷內臣寄遷法。辛丑宋庠罷。以曾公亮為樞密使。張昇孫抃為參知政事。歐陽脩陳升之。趙槩為樞密副使。十二月己卯蘇茂州蠻寇邕州。辛巳補諸州父老百歲以上者十二人為州助教。是歲大食國來貢。

六年春正月乙未許兩制與臺諫相見。二月丁巳詔宗室賜名授官者須年及十五方許轉官。乙丑詔良民子弟或為人誘隸軍籍。自今兩月內



父母訢官者還之丙寅錄繫囚降罪一等徒以  
下釋之三月己亥富弼以母喪去位庚子以富  
弼母喪罷大宴戊申給西京周廟祭享器服是  
月賜進士諸科及第同出身二百九十五人夏四月  
辛酉詔嶺南官吏歿于儂賊而其家流落未能自  
歸者所在給食護送還鄉庚辰陳升之罷以包拯  
為樞密副使出諫官唐介趙抃御史范師道呂誨五  
月丙戌官諸路敦遣行義文學之士七人庚戌錄繫  
囚降罪一等徒以下釋之分命官錄三京繫囚六月  
壬子朔日有食之乙丑太白晝見壬申歲星晝見丙

子以司馬光知諫院入對戊寅以王安石知制誥  
秋七月乙酉泗州淮水溢丙戌詔淮南江浙水災  
差官體量蠲稅戊子錄昭憲皇太后孝明孝惠孝  
章淑德皇后家子孫進秩授官者十有九人癸巳  
詔臺諫為耳目之官乃聽險陂之人興造飛語中  
傷善良非忠孝之行也中書門下其申徹百工  
務敦行實循而弗改者紕之八月乙亥策制舉人  
丁丑詔諸路刺舉之官未有以考其賢否比令  
有司詳定厥制其各務祇新書以稱朕意仍令  
考校轉運提刑課績院以新定條目施行戊寅



詔州縣長吏有清白不擾而實惠及民者令本  
路監司保薦再任政迹尤異當加獎擢閏月乙  
酉復以成都府爲劔南西川節度庚子以韓琦  
爲昭文館大學士曾公亮同中書門下平章事  
集賢殿大學士張昇爲樞密使辛丑以胡宿  
爲樞密副使冬十月壬午定內侍磨勘法丙戌  
詔京西淮浙荆湖增置都同巡檢壬辰起復皇  
姪前右衛大將軍岳州團練使宗實爲秦州防  
禦使知宗正寺辭以喪不拜十月己巳許夏國  
用漢衣冠癸酉賜昭憲皇太后家信陵坊第

戊寅許康州刺史李樞以己官封贈父母十二月  
丙戌復豐州庚寅命諸路總管集隨軍功過簿以  
備遷補是歲冬無米占城國獻馴象安化州蠻來  
貢

七年春正月辛未復命皇姪宗實爲秦州防禦  
使知宗正寺乙亥詔南郊以太祖配爲定制改溫  
成皇后廟爲祠殿二月己卯朔更江西鹽法詔  
開封府市地于四郊給錢瘞民之不能葬者癸  
未錄繫囚命官錄被水諸州繫囚三月辛亥詔  
禮部貢舉乙卯孫抃罷以趙槩參知政事吳奎



為樞密副使甲子以旱罷大宴乙丑祈雨于西太  
一宮庚午謝雨壬申徐州彭城濠州鍾離地生麩  
十餘頃民皆取食夏四月壬午頒嘉祐編敕己丑  
夏國王諒祚進馬求賜書詔賜九經還其馬五月  
戊午太白晝見庚午包拯卒六月丙子朔歲星晝  
見秋七月戊申太白經天壬子詔季秋有事於明  
堂八月己亥朔出明堂樂章肄於太常己卯詔  
以宗實為皇子癸未賜名曙丁亥奉安真宗御容  
於壽星觀庚子以立皇子告天地宗廟諸陵九月  
乙巳朔以皇子為齊州防禦使進封鉅鹿郡公  
己酉朝饗景靈宮庚戌饗太廟辛亥大饗明堂奉  
真宗配大赦己未加恩百官冬十月乙亥皇子  
表辭所除官賜詔不允丙戌白虹貫日乙未太  
白晝見丙申詔內藏庫三司共出緡錢一百萬  
助糴天下常平倉十二月甲午德妃沈氏為貴  
妃賢妃苗氏為德妃丙申幸龍圖天章閣召羣  
臣宗室觀祖宗御書又幸寶文閣為飛白書分  
賜從臣作觀書詩命韓琦等屬和遂宴羣玉殿  
庚子再召從臣于天章閣觀瑞物復宴羣玉殿  
是歲冬無冰占城來貢



八年春正月辛亥交趾貢馴象九月癸未帝  
不豫甲申下德音減天下囚罪一等徒以下釋之  
丙戌中書樞密奏事于福寧殿之西閣三月戊申  
麗籍薨癸亥御內東門帷殿優賜諸軍緡錢甲子  
御延和殿賜進士諸科及第同出身三百四十八  
辛未帝崩于福寧殿遺制皇子卽皇帝位皇后爲  
皇太后喪服以日易月山陵制度務從儉約謚曰  
神文聖武明孝皇帝廟號仁宗十月甲午葬永  
昭陵

贊曰仁宗恭儉仁恕出於天性一遇水旱或密禱  
禁廷或跪立殿下有司請以玉清舊地爲御苑帝曰  
吾奉先帝苑囿猶以爲廣何以是爲燕私常服澣濯  
帷帟衾裯多用繒纈宮中夜饑思膳燒羊戒勿宣索  
恐膳夫自此戕賊物命以備不時之須大辟疑者皆  
令上讞歲常活千餘吏部選人一坐失入死罪皆終  
身不遷每諭輔臣曰朕未嘗詈人以死況敢濫用辟  
乎至於夏人犯邊禦之出境契丹渝盟增以歲幣在  
位四十二年之間吏治若媮惰而任事殘刻之人  
刑法似縱弛而決獄多平允之士國未嘗無弊倖而  
不足以累治世之體朝未嘗無小人而不足以勝善



類之氣君臣上下惻怛之心忠厚之政有以培壅朱  
三百餘年之基子孫一矯其所為馴致於亂傳曰為  
人君止於仁帝誠無愧焉。

本紀卷第十二

本紀卷第十三

宋史十三

開府儀同三司權輿國事節書丞相魯國更領經筵事都總裁臣脫脫等奉  
勅修

英宗

英宗體乾應曆隆功盛德文肅武睿聖宣孝皇帝諱  
曙濮安懿王允讓第十三子母曰仙遊縣君任氏明  
道元年正月三日生於宣平坊第初娠夢兩龍與日  
並墮以衣衣之及帝生赤光滿室或見黃龍游光中  
四歲仁宗養於內寶元二年豫王生乃歸淮邸帝天  
性篤孝好讀書不為燕嬉褻慢服御儉素如儒者每



以朝服見教授曰師也敢弗爲禮時吳王宮教吳克進宗室六箴仁宗付宗正帝書之屏風以自戒景祐三年賜名宗實授左監門衛率府副率累遷右羽林軍大將軍宜州刺史皇祐二年爲右衛大將軍岳州團練使嘉祐中宰相韓琦等請建儲仁宗曰宗子已有賢知可付者卿等其勿憂時帝方服濮王喪六年十月辛卯起爲秦州防禦使知宗正寺帝以終喪辭奏四上乃聽喪終復授前命又辭七年八月許罷宗正復爲岳州團練使戊寅立爲皇子癸未改今名帝聞詔稱疾益堅辭詔同判大宗正事安國公從古等

往諭旨卽卧内起帝以入甲辰見清居殿自是日再朝或入侍禁中九月遷齊州防禦使鉅鹿郡公八年仁宗崩夏四月壬申朔皇后傳遺詔命帝嗣皇帝位百官入哭盡哀韓琦宣遺制帝御東楹見百官癸酉大赦賜百官爵一等優賞諸軍如乾興故事遣王道恭告哀于契丹帝欲亮陰三年命韓琦攝家宰宰臣不可乃止乙亥帝不豫遣韓贄等告卽位于契丹丙子尊皇后曰皇太后巳卯詔請皇太后同聽政壬午皇太后御小殿垂簾宰臣覆奏事乙酉作受命寶丁亥以皇子右千牛衛將軍仲鍼爲安州觀察使光國



公熒惑自七年八月庚辰不見命宰臣祈禳至是月  
巳丑見于東方庚子立京兆郡君高氏爲皇后五月  
戊午以富弼爲樞密使戊辰初御延和殿以疾未平  
命宰臣祈福于天地宗廟社稷及寺觀又禱于岳瀆  
名山六月辛卯契丹遣蕭福延等來祭弔秋七月壬  
子初御紫宸殿帝自六月癸酉不御殿至是始見百  
官癸亥歲星晝見乙丑星大小數百西流戊辰百官  
請大行皇帝謚于南郊八月癸巳以生日爲壽聖節  
九月辛亥以光國公仲鍼爲忠武軍節度使同中書  
門下平章事淮陽郡王改名頊戊午上仁宗謚冊于

福寧殿冬十月甲午葬仁宗于永昭陵十一月丙午  
祔于太廟大風霾巳酉減東西二京罪囚一等免山  
陵役戶及靈駕所過民租辛亥契丹遣蕭素等來賀  
卽位十二月巳巳初御邇英閣召侍臣講讀經史乙  
亥淮陽郡王頊出閣是歲于闐西南蕃來貢  
治平元年春正月丁酉朔改元戊戌太白晝見巳亥  
壽聖節百官及契丹使初上壽于紫宸殿甲寅賞知  
唐州趙尚寬脩溝堰增戶口進一宮賜錢二十萬三  
月壬寅命脩秦悼王塚置守護官戊午錄囚辛酉雨  
土夏四月癸未放宮女百三十五人甲午祈雨于相



國天清寺醴泉觀賜諸軍錢有差五月己亥濬二股  
河戊申皇太后還政庚戌初日御前後殿壬子詔皇  
太后稱聖旨出入儀衛如章獻太后故事其有所須  
內侍錄聖旨付有司覆奏卽行丙辰上皇太后宮殿  
名曰慈壽己未熒惑犯太微上將壬戌以病愈命宰  
臣謝天地宗廟社稷及宮觀閏月戊辰輔臣進爵一  
等六月己亥以淮陽郡王頊為潁王祈國公顥為保  
寧軍節度使同中書門下平章事東陽郡王鄂國公  
頽為左衛上將軍增宗室教授丁未增同知大宗正  
事一員辛亥作睦親廣親宅辛酉太白晝見壬戌歲

星晝見八月甲辰錄周世宗後甲寅太白入太微垣  
乙卯遣兵部員外郎呂誨等四人充賀契丹太后生  
辰正旦使刑部郎中章岷等四人充賀契丹主生辰  
正旦使丙辰內侍都知任守忠坐不法貶保信軍節  
度副使蘄州安置丁巳以上供米三萬石振宿亳二  
州水災戶九月丁卯復武舉庚午詔夏國精擇使人  
戒勵毋各彞章冬十月丙申詔中外近臣監司舉治  
行素著可為升擢者二人十一月乙亥科陝西戶三  
丁之一刺以爲義勇軍凡十三萬八千四百六十五  
人各賜錢二千諫官司馬光累上疏諫之不允戊寅



復內侍養子十二月乙巳兩土丙辰契丹遣耶律  
烈等來賀壽聖節蕭禧等來賀明年正旦是歲畿內  
宋亳陳許汝蔡唐潁曹濮濟單濠泗廬壽楚祐宣洪  
鄂施渝州光化高郵軍大水遣使行視疏治振恤蠲  
其賦租西蕃賸檀子賸欺米征內附

二年春正月甲戌振蔡州二月甲辰大風晝暝丁未  
錄囚是月賜禮部奏名進士明經諸科及第出身三  
百六十一人三月己巳班明天曆夏四月戊戌詔議  
崇奉濮安懿王典禮辛丑詔監司知州歲薦吏母徒  
充數丙午奉安仁宗御容于景靈宮丁未白氣起西

方五月癸亥詔以綜核名實勵臣下丙子詔自今皇  
子及宗室屬卑者勿授以檢校師傅官乙酉詔宗室  
封王者子孫襲爵六月壬辰錄囚己酉詔尚書集三省  
御史臺議奉濮安懿王典禮甲寅罷尚書省集議令  
有司博求典故務在合經詔遣官與契丹定疆界秋  
七月癸亥富弼罷丙寅詔減乘輿服御丙子放宮女  
百八十人丁丑太白晝見己卯群臣五上尊號不允  
庚辰張昇罷以文彥博為樞密使八月庚寅京師大  
雨水癸巳賜被水諸軍米遣官視軍民水死者千五  
百八十人賜其家緡錢葬祭其無主者乙未以兩災



詔責躬乞言初學士草詔曰執政大臣其惕思天變  
帝書其後曰雨災專以戒朕不德可更曰協德交脩  
己亥以水災罷開樂宴壬子以工部郎中蔡抗等充  
賀契丹生辰使侍御史趙鼎等充賀契丹正旦使乙  
卯減衮冕制度丙辰陝西置壯城兵九月壬戌雨罷  
大宴己巳以災異風俗策制舉人壬午太白犯南斗  
乙酉以久雨遣使祈于岳瀆名山大川冬十月乙巳  
雨木冰十一月庚午朝饗景靈宮辛未饗太廟壬申  
有事南郊大赦上皇太后冊用皇后以齊州為興德  
軍節度辛巳加恩百官十二月辛亥太白晝見是歲

蔣波繡雲龍賜等州來貢

三年春正月丙辰朔契丹遣使耶律仲達等來賀正  
旦戊午契丹遣使蕭惟輔等來賀壽聖節丙寅幸降  
聖院謁神御殿癸酉契丹改國號為遼己卯温州火  
燒民屋萬四千間死者五千人丁丑皇太后下書中  
書門下封濮安懿王宜如前代故事王夫人王氏韓  
氏任氏皇帝可稱親尊濮安懿王為皇夫人為后詔  
遵慈訓以瑩為園置守衛吏即園立廟俾王子孫主  
祠事如皇太后旨辛巳詔臣民避濮安懿王諱以王  
子宗懿為濮國公壬午黜御史呂誨范純仁呂大防



二月乙酉朔白虹貫日三月庚申彗星晨見于室辛酉黜諫官傅堯俞御史趙鼎趙瞻戊辰上親錄囚庚午以彗避正殿減膳辛未以黜呂誨等詔內外癸酉以災異責躬詔轉運使察獄訟調後利病大者以聞辛巳彗晨見于昴如太白長丈有五尺壬午孛于畢如月夏四月丙午詔有司察所部左道淫祀及賊殺善良不奉令者罪毋赦五月甲子罷知雜御史觀察使以上歲舉人乙丑彗至張而沒戊辰謂宰相曰朕欲與公等日論治道中書常務有定制者付有司行之六月己酉錄囚秋七月乙丑進濮王子孫及魯王

孫爵一等八月庚午遣傳下等賀遼主生辰張師顏等賀正旦九月壬子朔日有食之癸亥定待制諫官朝官少卿郎中遷選歲月補員格庚辰禁妃嬪公主以下薦服親之夫冬十月壬午朔以仙遊縣君任氏墳域爲園乙酉詔兩日一御邇英閣丁亥詔禮部三歲一貢舉甲午詔宰臣叅知政事舉才行士可試館職者各五人十一月戊午帝不豫禱于大慶殿己未宰相始奏事辛酉降天下囚死罪一等流以下釋之十二月乙未宰相祈于天地宗廟社稷壬寅立賴王頊爲皇太子癸卯大赦賜文武官子爲父後者勳一



轉遼遣蕭靖等來賀正旦壽聖節是歲遣使以違約  
數寇責夏國諒祚獻方物謝罪

四年春正月庚戌朔羣臣上尊號曰體乾膺曆文武  
聖孝皇帝降天下囚罪一等徒以下釋之大風霾辛  
亥蠲京師逋餽錢丁巳帝崩于福寧殿壽三十六謚  
曰憲文肅武宣孝皇帝廟號英宗帝自居睦親宅孝  
德著聞濮安懿王薨以所服玩物分諸子帝所得悉  
以與王府舊人既葬而辭去者宗室有假金帶而以  
銅帶歸主吏以告帝曰真吾帶也受之命殿侍鬻犀  
帶直錢三十萬亡之帝亦不問初辭皇子請潭王宮

教授周孟陽作奏孟陽有所勸戒卽謝而拜之奏十  
餘不允始就召戒舍人曰謹守吾舍上有適嗣吾歸  
矣既爲皇子慎靜恭默無所猷爲而天下陰知其有  
聖德卽位每命近官必以官而不以名大臣從容以  
爲言帝曰朕雖宮中命小臣亦未嘗以名也一日語  
神宗曰國家舊制士大夫之子有尚帝女皆升行以  
避舅姑之尊義甚無謂朕嘗思此寤寐不平豈可以  
富貴之故屈人倫長幼之序也可詔有司革之會疾  
不果神宗述其事焉

贊曰昔人有言天之所命人不能違信哉英宗以明



哲之資膺繼統之命執心固讓若將終身而卒踐帝位豈非天命乎及其臨政臣下有奏必問朝廷故事與古治所宜每有裁決皆出羣臣意表雖以疾疢不克大有所爲然使百世之下欽仰高風詠歎至德何其盛也彼隋晉王廣唐魏王泰窺覷神器矯揉奪嫡遂啓禍原誠何心哉誠何心哉

本紀卷第十三

本紀卷第十四

宋史十四

開府儀同三司上柱國錄軍國重事尚書右丞相監修國史領經筵事都總裁呂脫等奉勅修

神宗一

神宗紹天法古運德建功英文烈武欽仁聖孝皇帝諱項英宗長子母曰宣仁聖烈皇后高氏慶曆八年四月戊寅生于濮王宮祥光照室群鼠吐五色氣成雲八月賜名仲鍼授率府副率三遷至右千牛衛將軍嘉祐八年侍英宗入居慶寧宮嘗夢神人捧之登天英宗即位授安州觀察使封安國公是年五月壬



成受經于東宮帝龍準龍顏動止皆有常度而天性  
好學請問至日晏忘食英宗常遣內侍止之帝正衣  
冠拱手雖大暑未嘗用扇侍講王陶入侍帝率弟顥  
拜之九月加忠武軍節度使同中書門下平章事封  
淮陽郡王改今諱治平元年六月進封穎王三年三  
月納故相向敏中孫女爲夫人十月英宗不豫帝引  
仁宗故事請兩日一御邇英閣講讀以安人心十二  
月壬寅立爲皇太子四年正月丁巳英廟崩帝卽皇  
帝位戊午赦天下常赦所不原者遣馮行已告哀于  
遼己未尊皇太后曰太皇太后皇后曰皇太后命宰

相韓琦爲山陵使辛酉遣孫坦等告卽位于遼以大  
行皇帝詔賜夏國主及西蕃喃廝囉丙寅群臣表三  
上始御迎陽門幄殿聽政內醫侍先帝疾者皆坐不  
謹貶之詔東平郡王允弼襄陽郡王允良朝朔望以  
吳奎終喪復授樞密副使戊寅以韓琦守司空兼侍  
中曾公亮行門下侍郎兼吏部尚書進封英國公文  
彥博行尚書左僕射檢校司徒兼中書令富弼改武  
寧軍節度使進封鄭國公曹佾改昭慶軍節度使檢  
校太傅張昇改河陽二城節度使宗諤同中書門下  
平章事改集慶軍節度使檢校尚書左僕射歐陽脩



趙槩並加尚書左丞仍叅知政事陳升之爲戶部侍郎呂公弼爲刑部侍郎允弼允良並加守太保弟東陽郡王顥進封昌王郡國公頽進封樂安郡王群臣進秩有差二月乙酉初御紫宸殿立向氏爲皇后丁亥召入內侍省皇城司合覆奏事並執條覆奏戊子進封交趾郡王李日尊爲南平王加邈川首領董羶檢校太保詔山陵所須應委三司轉運司計置毋輒擾民詔提舉醫官院試堪診御脉者六人庚寅以四月十日爲同天節辛卯白虹貫日壬辰詔公主下嫁者行見舅姑禮甲辰西蕃首領拽羅鉢鳩令結二

人誘蕃部三百餘帳投夏國捕獲斬之以徇三月壬子曹佺加檢校太尉兼侍中賜禮部進士及第出身四百六十一人甲寅陝西宣撫使郭達討蕃部党令征等平之賜昌王顥公使錢歲萬緡半給之丙辰昌王顥樂安郡王顥乞解官行服不許癸亥詔入內侍省官已經壽聖節任子者同天節權罷奏薦壬申歐陽脩知亳州癸酉吳奎參知政事罷乙亥允良薨閏月癸未太白晝見甲申夏國主諒祚遣使謝罪辛卯詔齊密登華邠耀鄜絳潤婺海宿饒歙吉建汀潮等十八州知州慶渭秦延四州通判其選並從中書



毋以恩例奏授乙未張昇以太子太師致仕庚子詔  
求直言御史中丞王陶乞許舉知縣資序人為御史  
裏行從之癸卯王安石出知江寧府甲辰詔諸路帥  
臣及副總管或有移易依慶曆故事乙巳詔以孟夏  
農勞之時令監司戒飭州縣省事勸民力田民有艱  
食者振之夏四月庚戌請大行皇帝謚于南郊辛酉  
詔內外所上封事令張方平司馬光詳定以聞丙寅  
錄囚御史中丞王陶侍御史吳申呂景以過毀大臣  
陶出陳州申景各罰銅二十斤吳奎罷知青州遣使  
循行陝西河北京東京西路體量安撫壬申奎復位

罷州郡歲貢飲食果藥癸酉詔陝西河東經畧轉運  
司察主兵臣僚怯懦老病者以聞五月辛巳以久旱  
命宰臣禱雨乙巳寶文閣成置學士直學待制官六  
月巳酉遼遣蕭餘慶等來弔祭巳未振河北流民辛  
未詔天下官吏有能知徭役利病可議寬減者以聞  
乙亥詔中書樞密細務歸之有司秋七月庚辰詔察  
富民與妃嬪家昏因夤緣得官者甲申石蕃來貢巳  
丑命尚書戶部郎中趙抃刑部郎中陳薦同詳定中  
外封事辛卯告英宗憲文肅武宣孝皇帝謚于天地  
宗廟社稷壬辰上寶冊于福寧殿丙午文州曲水縣



令宇文之邵上書指陳得失八月丁未朔太白晝見  
戊午復西夏和市己巳京師地震癸酉葬英宗于永  
厚陵九月丁丑詔減諸路逃田稅額壬午祧僖祖及  
文懿皇后乙酉祔英宗神主于大廟樂曰大英之舞  
戊子減兩京畿內鄭孟州囚罪一等民役山陵者蠲  
其賦辛卯徙封顥為岐王頥為高密郡王富弼為尚  
書左僕射遣孫思恭等報謝于遼且賀生辰正旦壬  
辰錄周世宗從曾孫貽廓為三班奉職甲午遼遣耶  
律好謀等來賀即位戊戌以王安石為翰林學士辛  
丑韓琦罷為司徒鎮安武勝軍節度使判相州吳奎

陳升之罷樞密副使呂公弼為樞密使張方平趙林  
並參知政事邵亢為樞密副使壬寅以曾公亮為尚  
書左僕射文彥博為司空潮州地震癸卯以權御史  
中丞司馬光為翰林學士冬十月丙午漳泉諸州地  
震丁未富弼罷判河陽戊申建州邵武興化軍地震  
己酉初御邇英閣召侍臣講讀經史以右諫議大夫  
權御史中丞滕甫致諸路監司課績張方平以父憂  
去位庚戌給陝西轉運司度僧牒令糴穀振霜旱州  
縣癸丑詔翰林學士御史中丞侍御史知雜事舉材  
堪御史者各二人詔將作監主簿常秩赴闕甲寅製



資治通鑑序賜司馬光癸酉知青澗城种諤復綏州。十一月丁丑詔近臣各舉才行可任使者一人戊寅詔求直言丙戌詔二府各舉所知丁亥令考課院詳定諸州所上縣令治狀戊子分命宰臣祈雪置馬監于河東交城縣庚寅詔近臣以奉官不當經三劾者中書別奏取旨乙未詔令内外文武官合舉有材德行能者十二月丙辰西南龍蕃來貢辛酉以來歲日食正旦自乙丑避殿減膳罷朝賀壬戌詔起居日增轉對官二人丙寅詔州縣吏並緣爲姦致獄多瘦死歲終會死者多寡以制其罪著爲令巳巳遼遣蕭傑等來賀正旦

熙寧元年春正月甲戌朔日有食之詔改元丁丑以旱減天下囚罪一等杖以下釋之壬午令州縣掩暴骸丁亥命宰臣曾公亮等極言闕失庚寅御殿復膳壬辰幸寺觀祈雨丙申趙槩罷知徐州三司使唐介參知政事丁酉詔修英宗實錄壬寅增太學生百人二月辛亥令諸路每季上雨雪乙卯孔子蒙襲封衍聖公壬戌貸河東飢民粟三月庚辰夏至諒祚卒遣使來告哀丙戌詔恤刑戊子作太皇太后慶壽宮皇太后寶慈宮丁酉簡州木連理潭州雨毛夏四月乙



已詔翰林學士王安石越次入對戊申命宰臣禱雨以樞密直學士李參爲尚書右丞判西京畱守司御史臺辛亥同天節羣臣及遼使初上壽于紫宸殿五月甲戌募饑民補廂軍庚辰詔兩制及國子監舉諸王宮學官戊戌廢慶成軍六月癸卯錄唐魏徵狄仁傑後丁未占城來貢辛亥詔諸路興水利己亥河決棗疆縣丙寅命司馬光滕甫裁定國用秋七月癸酉詔謀殺已傷案問欲舉自首者從謀殺減二等己亥名泰州新築大甘谷口砦曰甘谷城丁丑詔諸路帥臣監司及兩制知雜御史已上各舉武勇謀畧三班

使臣二名賜布衣王安石進士及第己卯群臣三表請上奉元憲道文武仁孝之號不許陳升之知樞密院事給濮州雷澤縣堯陵守戶壬午以恩冀州河決賜水死家緡錢及下戶粟甲申京師地震乙酉又震大雨辛卯以河朔地大震命沿邊安撫司及雄州刺史候遼人動息以聞賜壓死者緡錢京師地再震壬辰遣御史中丞滕甫知制誥吳充安撫河北癸巳䟽深州溢水甲午減河北路囚罪一等丁酉賜河北安撫司空名誥募民入粟己亥回鶻來貢八月壬寅詔京東西路存恤河北流民京師地震甲辰又震乙



卯賜河東及鄜延路轉運司空名誥敕募民入粟實  
邊甲子詔中書門下考屬近行尊者一人王之丙寅  
罷宗諤平章事丁卯遣張宗益等賀遼主生辰正日  
九月辛未太祖曾孫舒國公從式進封安定郡王丁  
亥減后妃臣僚薦奏推恩戊子莫州地震有聲如雷  
丁酉詔三司裁定宗室月料嫁娶生日郊禮給賜冬  
十月辛丑給天下繫囚衣食薪炭乙卯出奉宸庫珠  
付河北買馬戊辰禁銷金服飾十一月癸酉太白晝  
見癸未命宰臣禱雪丙戌朝饗太廟遂齋于郊宮廢  
青城後苑丁亥祀天地于圜丘大赦群臣進秩有差

乙未京師及莫州地震十二月己亥朔命宰臣禱雪  
癸卯瀛州地大震庚戌賜夏國主秉常詔許納塞門  
安遠二砦歸其綏州辛亥錄唐段秀實後癸丑禱雪  
于郊廟社稷庚申以判汝州富弼為集禧觀使詔乘  
驛赴闕壬戌雪甲子遼遣耶律公質等來賀正旦

二年春正月甲午奉安英宗神御于景靈宮英德殿二  
月己亥以富弼同中書門下平章事庚子以王安石  
叅知政事命翰林學士呂公著修英宗實錄乙巳帝  
以災變避正殿減膳徹樂甲子陳升之王安石創置  
三司條例議行新法三月乙酉詔漕運鹽鐵等官各



具財用利害以聞丙戌命宰臣禱雨戊子秉常上誓  
表納塞門安遠二砦乞緩州詔許之乙未以旱慮囚  
四月丁酉朔群臣再上尊號不許戊戌省內外土木  
工壬寅遼遣耶律昌等來賀同天節丁未唐介薨臨  
其喪戊申宰臣富弼曾公亮以早上表待罪詔不允  
癸丑命曾公亮為西京奉安仁宗英宗御容禮儀使  
丁巳遣使諸路察農田水利賦役戊午外任大使臣  
年七十以上令監司體量直除致仕者更不與子孫  
推恩甲子御殿復膳免河北歸業流民夏稅五月辛  
未宴紫宸殿初用樂已卯賜河北役兵特支錢癸未

翰林學士鄭獬罷知杭州宣徽北院使王拱辰罷判  
應天府知制誥錢公輔罷知江寧府丁亥奉安仁宗  
英宗御容于會聖宮及應天院甲午減西京囚罪一  
等台州民延贊等九人年各百歲以上並授本州助  
教六月丁巳右諫議大夫御史中丞呂誨以論王安  
石罷知鄧州以翰林學士呂公著為御史中丞命龍  
圖閣直學士張揆兼編排錄用勲臣子孫壬戌太白  
晝見秋七月乙丑朔日當食雲陰不見庚午詔御史  
中丞舉推直官及可兼權御史者甲戌東平郡王允  
弼薨辛巳立淮浙江湖六路均輸法壬午振恤被水



州軍仍蠲竹木稅及酒課癸未詔自今文臣換右職者須實有謀勇曾著績効即得取旨甲申日下有五色雲巳丑韓琦上仁宗實錄曾公亮上英宗實錄八月癸卯侍御史劉琦貶監處州鹽酒務御史裏行錢顛貶監衢州鹽稅亦以論安石故乙巳殿中侍御史孫昌齡以論新法貶通判蘄州丙午同脩起居注范純仁以言事多忤安石罷同知諫院戊申河徙東行夏國請從舊蕃儀詔許之巳酉范純仁知河中府甲寅朝神御殿辛酉以秘書省著作佐郎程顥王子韶並為太子中允權監察御史裏行壬戌侍御史知雜

事劉述同判刑部丁諷坐受刑名救不即下述貶知江州諷貶通判復州審刑院詳議官王師元坐言許遵所議刑名不當貶監安州稅九月甲子朔交州來貢乙丑以古勿峒効順首領儂智會為右千牛衛大將軍丁卯立常平給歛法戊辰出內庫緡錢百萬糴河北常平粟丁丑遣孫固等賀遼主生辰正旦辛卯廢奉慈廟壬辰以秘書省著作佐郎呂惠卿為太子中允崇政殿說書冬十月丙申富弼罷為武寧軍節度使判亳州曾公亮陳升之並同中書門下平章事城綏州命郭逵選將置守具逵遣趙卨夏人所納



安遠塞門二砦就定地界夏人渝初盟高請城綏州不以易二砦因改名綏德城戊戌以蕃官禮賓使折繼世為忠州刺使左監門衛將軍鬼名山為供備庫使仍賜姓名趙懷順丙辰詔御史請對並許直由閣門上殿戊午宗諤復平章事己未夏人來謝封冊辛酉錄楊承信曾孫立田重進曾孫章為三班借職十一月乙丑命韓絳制置三司條例甲戌詔祖宗之後世襲補外官非袒免親罷賜名授官丙子罷諸路提刑武臣須農田水利約束壬午御邇英閣聽講賜汴口役兵錢己丑減天下囚罪一等徒以下釋之閏月

庚子濬御河壬子置交子務是月差官提舉諸路常平廣惠倉兼管勾農田水利差役事十二月癸亥朔復減后妃公主及臣僚推恩癸酉增失入死罪法丙戌增三京留司御史臺國子監及宮觀官以處卿監監司知州之老者戊子遼遣蕭惟禧來賀正日是歲交州來貢

本紀卷第十四



本紀卷第十五

宋史十五

開府儀同三司柱國錄軍國重事前中書右丞相監修國史領經筵事都總裁臣脫等奉  
勅修

神宗二

三年春正月癸丑錄唐李氏周柴氏後。乙卯詔諸路  
散青苗錢禁抑配。戊午判尚書省張方平罷知陳州。  
二月壬申以翰林學士司馬光為樞密副使。凡九辭。  
詔收還敕誥。甲戌以河州刺史賧欺丁木征為金紫。  
光祿大夫檢校刑部尚書乙酉韓琦罷河北安撫使。  
為大名府路安撫使。三月丙申孫覺呂公著張戢程



顯李常上疏極言新法不聽。己亥始策進士罷詩賦論三題。戊申李常言青苗歛散不實有旨具折翰林學士無知通進銀臺司范鎮封還詔書以為不當坐罷職守本官。壬子賜禮部奏名進士明經及第八百二十九人。乙卯詔諸路毋有留獄。丙辰立試刑法及詳刑官。右正言孫覺以奉詔反覆貶知廣德軍。夏四月癸亥幸金明池觀水嬉宴射瓊林苑。丙寅遼遣耶律寬來賀同天節。丁卯給兩浙轉運司度僧牒募民入粟。戊辰御史中丞呂公著貶知潁州。己卯趙抃罷知杭州。以韓絳參知政事。監察御史裏行程顥罷為

京西路同提點刑獄。壬午右正言李常貶通判滑州。監察御史裏行張戢貶知公安縣。王子韶貶知上元縣。癸未侍御史知雜事陳襄罷為同修起居注。程顥簽書鎮寧軍節度判官公事。前秀州軍事判官李定為太子中允。監察御史裏行五月癸巳詔並邊州郡毋給青苗錢。太白晝見。壬寅詔令司馬光詳定轉對封事。甲辰詔罷制置三司條例。歸中書。辛亥賜進士蘇丕號安退處士。壬子罷入閣儀。丁巳詔以審官院為秉院。別置西院。六月癸酉日有五色雲。丁丑封宗室秦魯蔡魏燕陳越七王。後為公。戊寅詔修武成王



廟丙戌知諫院胡宗愈貶通判真州秋七月辛卯歐陽修徙知蔡州壬辰呂公弼罷樞密使以知太原府馮京爲樞密副使置潞州交子務戊戌雨雹癸丑詳定宗室襲封制度甲寅置三班院主簿八月戊午罷看詳銀臺司文字所丙寅以旱慮囚死罪以下遞減一等杖笞者釋之以衛州旱令轉運司振恤仍蠲租賦戊寅詔川峽福建廣南七路官令轉運司立格就注具爲令遣張景憲等賀遼主生辰正旦巳卯夏人犯大順城知慶州李復圭以方略授環慶略鈐轄李信慶州東路都巡檢劉甫監押种詠出戰兵少取敗

復圭誣信等違其節制斬信及劉甫种詠死於獄是月慶州巡檢姚兕敗夏人於荔原堡鈐轄郭慶都監高敏死之九月戊子朔中書置檢正官乙未韓絳罷爲陝西宣撫使巳亥始試法官庚子曾公亮罷爲司空兼侍中河陽三城節度使辛丑以馮京參知政事翰林學士吳充爲樞密副使乙巳親策賢良方正及武舉壬子太白晝見癸丑作東西府以居執政司馬光罷知永興軍詔環慶陣亡義勇餘丁當刺者悉免之冬十月辛酉詔延州毋納夏使甲子雨木冰壬申朝謁神御殿丙子知慶州李復圭擅興兵敗績誣裨



將李信劉甫种詠以死御史劾之貶保靜軍節度副使戊寅陳升之以母憂去位乙酉詔罷諸場務內侍監當十一月戊子振河北饑民徙京西者已丑宮節行之士二十一人壬辰蠲陝西蕃部貸糧癸卯授布衣王存下班斂侍三班差使宣撫司指揮使甲辰夏人寇大順城都監燕達等擊走之庚戌詔升朝官除南郊赦封贈父母外不得以加恩轉官乙卯以韓絳兼河東宣撫使梓州路轉運使韓琦等以能興利除害賜帛有差十二月己未詔立諸路更戍法舊以他路兵雜戍者遣還乙丑立保甲法丁卯以韓絳王安

石並同中書門下平章事王珪參知政事賜布衣陳知彥進士出身知縣王輔同進士出身庚午夏人寇鎮戎軍三川砦巡檢趙普伏兵邀擊敗之丁丑增廣南攝官奉戊寅初行免役法賜西蕃董璫詔并衣帶鞍馬庚辰命王安石提舉編修三司令式壬午遼遣蕭遵道等來賀正旦癸未命宋敏求詳定命官使臣過犯是歲振河北陝西旱饑除民租交趾入貢廣源下溪州蠻來附

四年春正月丁亥朔不視朝己丑种諤襲夏兵于羅兀北大敗之遂城囉兀自是夏人日聚兵為報復計



言者以諤為稔邊患不便壬辰王安石請鬻天下廣  
惠倉田為三路及京東常平倉本從之乙未渝州夷  
賊李光吉叛巡檢李宗閔等戰死命夔州路轉運使  
孫構討平之詔詳定大辟覆讞法丁酉朝謁太祖太  
宗神御殿庚子幸集禧觀宴從臣又幸大相國寺御  
宣德門觀燈韓絳等言种諤領兵入西界斬獲甚衆  
詔遣使撫問乙巳停括牧地丁未立京東河北賊盜  
重法庚戌罷永興軍買鹽鈔場甲寅定文德殿朔望  
視朝儀二月丁巳朔罷詩賦及明經諸科以經義論  
策試進士置京東西陝西河東河北路學官使之教

導辛酉詔治吏沮青苗法者戊辰詔振河北民乏食  
者賻恤西界戰死軍人庚午于闐國來貢壬申進封  
高密郡王頽為嘉王癸酉詔審宮院所定人赴中書  
察堪任者引見甲戌賜討渝州夷賊兵特支錢丁丑  
禱雨詔增漳河等役兵三月丁亥夏人陷撫寧堡戊  
子慶州廣銳卒叛尋討平之庚寅詔給諸路學田增  
教官員辛卯遣使察奉行新法不職者癸卯減河東  
陝西路囚罪一等徒以下釋之民緣軍事科役者蠲  
其租賦丙午种諤坐陷撫寧堡責授汝州團練使潭  
州安置丁未韓絳坐興師敗衄罷以本官知鄧州辛



亥錄唐李氏後夏四月丙辰朔恤刑辛酉遼遣蕭廣  
等來賀同天節壬戌遣環慶都鈐轄拜贊以兵屯邠  
涇河中以備西夏癸亥罷陝西交子法癸酉司馬光  
權判西京留臺种諤再貶賀州別駕甲戌詔司農寺  
月進諸路所上雨雪狀丙子遣使按視宿亳等州災傷  
仍令修飭武備壬午定進士考轉官五月甲午右諫  
議大夫呂晦卒壬寅詔許富弼養疾西京丙午高麗  
國來貢辛亥詔宗室率府副率以上遭父母喪及嫡  
孫承重並解官行服壬子詔恩冀等州災傷遣使振  
恤蠲其稅六月丁巳河北饑民為盜者減死刺配庚

申群臣三上尊號曰紹天法古文武仁孝皇帝不許  
甲子歐陽修以太子少師致仕丙寅慮囚甲戌富弼  
坐格青苗法徙判汝州秋七月戊子層檀國來貢甲  
午振恤兩浙水災乙未錄死事將校崔達子遇為三  
班奉職丁酉監察御史裏行劉摯罷監衡州鹽倉御  
史中丞楊繪貶知鄭州庚子詔宗室不得祀祖宗神  
御丁未詔唐鄧給流民田八月癸丑朔高麗來貢遣  
官體量陝西差役新法及民間利害甲寅詔郡縣保  
甲與賊鬪死傷者給錢有差庚申復春秋三傳明經  
取士癸酉遣楚建中等賀遼主生辰正旦置洮河安



撫司命王韶主之九月丙戌河決鄆州辛卯大饗明  
堂以英宗配赦天下內外官進秩有差庚子夏人入  
貢癸卯增選人奉冬十月壬子朔罷差役法使民出  
錢募役立選人及任子出官試法丙辰置樞密院檢  
詳官戊辰立太學生內外上舍法丙子詔罪人配流  
遇冬者至中春乃遣十一月壬午朔詔凡賞功罰罪  
事可懲勸者月頒之天下甲申詔蠲逋租丁亥作中  
太一宮壬寅開洪澤河達于淮十二月辛亥朔詔增  
賜國子監錢四千緡戊午歸夏俘己未安定郡王從  
式薨甲子封越國公世清為會稽郡王丙寅省諸路  
廂軍乙亥崇義公柴詠致仕子若訥襲封丙子遼遣  
耶律紀等來賀正旦

五年春正月己丑詔聽降羌歸國己亥詔太廟時饗  
以宗室使相已上攝事置京城邏卒察謗議時政者  
收罪之二月壬子龜茲來貢以兩浙水賜穀十萬石  
振之仍募民興水利壬戌詔罷陝西遞運銅錫癸亥  
太白晝見丙寅以知鄭州呂公弼為宣徽南院使判  
秦州龍圖閣直學士蔡挺為樞密副使三月甲午季  
日尊卒子乾德嗣遣使弔贈戊戌富弼以司空致仕  
進封韓國公立文武換官法丙午以內藏庫錢置市



易務夏四月庚戌朔立殿前馬步軍春秋校試殿最  
法乙卯遼遣耶律適等來賀同天節己未括閑田置  
弓箭手辛未塞北京決河五月辛巳詔以古渭砦爲  
安遠軍命王韶兼知軍行教閱法宗室非袒免親者  
許應舉庚寅以青唐大首領俞龍珂爲西頭供奉官  
賜姓名包順壬辰以趙尚寬等前守唐州辟田疏水  
有功增秩以勸天下丙午太白晝見行保馬法六月  
壬子曾公亮以太傅致仕癸亥詔以四場試進士丙  
寅作京城門銅魚符乙亥置武學秋七月壬寅初以  
文臣兼樞密都承旨閏月庚戌遣中書檢正官章惇

察訪荆湖北路詔入內供奉官以下已有養子更養  
次子爲內侍者斬八月甲申太子少師致仕歐陽修  
薨秦鳳路沿邊安撫王韶復武勝軍丁亥詔求歐陽  
修所撰五代史壬辰以武勝軍爲鎮洮軍癸巳遣摧  
台符等賀遼主生辰正旦乙未詔侍從及諸路監司  
各舉有才行者一人甲辰王韶破木征于鞏令城頒  
方田均稅法九月癸丑許宗室試換文資癸亥始御  
便殿攷校諸軍武技丙寅少華山崩詔壓死者賜錢  
貧者官爲葬祭淮南分東西路冬十月戊戌升鎮洮  
軍爲熙州鎮洮軍節度置熙河路減秦鳳囚罪一等



十一月癸丑河州首領瞎藥等來降以爲內殿崇班  
賜姓名包約。丁卯貶權監察御史裏行張英監荆南  
稅壬申分陝西爲永興秦鳳路仍置六路經略司章  
惇開梅山置安化縣十二月丙子赦亡命荆湖溪洞  
者丁丑詔太原置弓箭手戊寅詔寺觀奉聖祖及祖  
宗陵寢神御者免役錢改溫成廟爲祠壬午陳升之  
爲樞密使癸未雨土乙未築熙州南北關及諸堡砦  
巳亥遼遣蕭瑜等來賀正旦

六年春正月辛亥復禧祖爲太廟始祖以配感生帝  
祧順祖于夾室二月辛卯夏人寇秦州都巡檢使劉

惟吉敗之丙申永昌陵上宮東門火王韶復河州獲  
木征妻子壬寅以韓絳知大名府三月巳酉詔贈熙  
河死事將田瓊禮賓使錄其子三人孫一人。庚戌親  
策進士置經局命王安石提舉辛亥試明經諸科丙  
辰以四月朔日當食自丁巳避殿減膳降天下囚罪  
一等流以下釋之巳未置諸路學官壬戌賜奏名進  
士諸科及第出身五百九十六人甲子交州來貢丁  
卯宰相上表諸復膳不許詔進士諸科並試明法注  
官戊辰置刑獄檢法官庚午封李 尊子乾德爲交  
趾郡王夏四月甲戌朔日食不見乙亥御殿復膳西



南龍蕃諸夷來貢置律學丁丑遼遣耶律寧等來賀  
同天節甲午定齊徐等州保甲戊戌裁定在京吏祿  
五月癸卯朔播州楊貴遷遣子光震來貢以光震爲  
三班奉職戊申禱雨乙丑詔京東路察士人有行義  
者以聞遣中書檢正官熊本措置瀘夷西京左藏庫  
副使景思忠等攻燒遂州夷圍戰歿錄其子昌符等  
七人軍士死者賜其家錢帛有差辛未西南龍蕃來  
貢六月己亥置軍器監秋七月乙巳詔京西淮南兩浙  
江西荆湖等六路各置鑄錢監丙午大食陀婆離來  
貢己酉禱雨甲寅錄在京囚死罪以下降一等杖罪

釋之丁巳詔沿邊吏殺熟戶以邀賞者戮之乙丑分  
河北爲東西路丙寅夜西北有聲如磴八月壬申朔  
遣賈昌衡等賀僚主生辰正旦甲申罷簡州歲貢綿  
紬甲午賜熙河涇原軍士特交錢戊戌復比閭族黨  
之法九月壬寅置兩浙和糴倉立斂散法戊申詔興  
水利辛亥策武舉戊午岷州首領本令征以其城降  
王詔入岷州丙寅太白犯斗戊辰詔禱雨決獄冬十  
月辛未章惇平懿洽州蠻辛巳以復熙河洮岷疊宕  
等州御紫宸殿受羣臣賀解用服玉帶賜安石甲申  
朝獻景靈宮丙戌振兩浙江淮饑壬辰行折二錢丁



西遣使瘞熙河戰骨十一月癸丑中太一宮成減天下囚罪一等流以下釋之乙卯親祀太一宮丙寅大雪詔京畿收養老弱凍餒者十二月戊子詔決開封府囚丙申遼遣耶律洞等來賀正旦

七年春正月辛亥賞復岷洮等州功西京左藏庫使桑湜等遷官有差壬子幸中太一宮宴從臣又幸大相國寺御宣德門觀燈乙卯封皇子俊為永國公甲子熊本平瀘夷二月辛未于闐來貢發常平米振河陽饑民癸未詔三司歲會天下財用出入之數以聞已丑禱雨辛卯置客省引進四方館閣門使副等員

乙未知河州景思立等與青宜結鬼章戰于踏白城敗死廢遼州三月壬寅杰征鬼章寇岷州高遵裕遣包順等擊走之慮囚減死罪一等杖以下釋之癸卯以旱避殿減膳乙巳白虹貫日丙午遣使分行諸路募武士赴熙河庚戌詔熙河死事者家給錢有差罷兩浙增額預置紬絹令諸路監司察留獄癸丑群臣表請復膳不許丙辰遼遣林牙蕭禧來言河東疆界命太常少卿劉忱議之己未行方田法甲子遣使報聘于遼乙丑詔以災異求直言夏四月癸酉以旱罷方田是日雨遼遣耶律永寧等來賀同天節乙亥王



韶破西蕃於結河川丙子御殿復膳己卯以高遵裕  
為岷州團練使甲申詔邊兵死事無子孫者廩其親  
屬終身乙酉王韶進築珂諾城與蕃兵連戰破之斬  
首七千餘級焚三萬餘帳木征率酋長八十餘人詣  
軍門降雨雹丙戌王安石罷知江寧府以韓絳同中  
書門下平章事監修國史翰林學士呂惠卿參知政  
事置沅州丁酉詔王韶發本征及其家赴闕遼遣樞  
密副使蕭素議疆界于代州境上五月戊戌朔減熙  
河路囚罪一等流以下釋之辛丑詔河州瘞蕃部暴  
骸壬寅雨雹癸卯大雨雹辛亥罷賢良方正等科乙

丑大雨水壤陝平陸二縣六月戊寅賜討洮州將士  
特支錢丁亥作渾儀浮漏廣州鳳凰見以木征為榮  
州團練使賜姓名趙思忠秋七月癸卯群臣五上尊  
號曰紹天憲古文武仁孝皇帝不許癸亥詔河北兩  
路捕蝗又詔開封淮南提點提舉司檢覆蝗旱以米  
十五萬石振河北西路災傷八月丁丑賜環慶安撫  
司度僧牒以募粟振漢蕃饑民遣張芻等賀遼主生  
辰正旦辛卯詔免淮南開封府來年春夫除放邢洛  
等州秋稅癸巳置場於南薰安上門給流民米集賢  
院學士宋敏求上編修閣門儀制九月戊戌以時雨



降詔河北京西陝西淮南等路勸民趨耕有因事拘  
繫者釋之壬子三司火癸丑置京畿河北京東西路  
三十七將甲寅詔樞密院議邊防冬十月壬申詔韓  
琦富弼文彥博曾公亮條代北事宜以聞戊寅詔浙  
西路提舉司出米振常潤州饑庚辰置三司會計司  
以韓絳提舉辛巳以河北災傷減州軍文武官員癸  
巳以常平米於淮南西路易饑民所掘蝗種又振河  
北東路流民十一月巳未祀天地于圜丘赦天下十  
二月丙寅省熙河岷三州官百四十一員丁卯文武  
官加恩巳丑遼遣耶律寧等來賀正且是歲高麗入

貢清井長寧夷十郡及武都夷內附

八年春正月庚子蔡挺罷判南京留司御史臺馮京  
罷知亳州丙午分京東為東西路輟江南東路上供  
米均給災傷州軍丁未御宣德門觀燈乙卯詔出使  
廷臣所至采吏治能否以聞丙午詔所在流  
民願歸業者州縣齎遣之巳未洮西安撫司以歲旱  
請為粥以食羸戶饑者二月甲子增陝西錢監改鑄  
大錢癸酉以王安石同中書門下平章事戊寅詔樞  
密副都承旨張誠一等以李靖營陣法教殿前馬步  
軍乙酉初行河北戶馬法丙戌停京畿土功七年三



月丁酉振潤州饑戍戍知河州鮮于師中乞置蕃學  
教蕃酋子弟賜田十頃歲給錢千緡增解進士二人  
從之庚子遼蕭禧再來遣韓縝往河東會議癸丑知  
制誥沈括報聘復振常潤饑民戊午太白晝見夏四  
月乙丑詔減將作監冗官丁卯遼遣耶律景熙等來  
賀同天節乙亥正僖祖禘祫東嚮位戊寅以吳充為  
樞密使壬午湖南江水溢閏月乙未陳升之罷為鎮  
江軍節度使判揚州廣源州劉紀寇邕州歸化州儂  
智會敗之壬寅沈括上奉元曆癸卯以宣徽北院使  
張方平判永興軍分秦鳳路兵為四將壬子沂州民

朱唐告前餘姚縣主簿李逢謀反辭連右羽林大將  
軍世居及河中府觀察推官徐革命御史中丞鄧綰  
知諫院范百祿御史徐禧雜治之獄具世居賜死逢  
革等伏誅甲寅錄趙普後乙卯詔西南蕃五姓蠻五  
年一入貢五月辛酉朔慮囚降死罪一等杖以下釋  
之甲子分環慶兵為四將丁丑兩上及黃毛甲申熙  
河路蕃官殿直頊埋謀叛伏誅己丑遣使振鄜延環  
慶饑六月乙未日上有五色雲丙午醜汴水入蔡河  
以通漕己酉頒王安石詩書周禮義于學官辛亥以  
安石為尚書左僕射兼門下侍郎戊午太師魏國公



韓琦薨。己未以琦配饗英宗廟庭。秋七月甲子處州江水溢。戊寅太白晝見。戊子分涇原兵為五將。命韓縝如河東割地。八月庚寅朔日當食。雲陰不見。癸巳募民捕蝗。易粟苗損者償之。仍復其賦。丙申遣謝景溫等賀遼主生辰。正旦減官戶役錢之半。詔發運司體實淮南江東兩浙米。賈州縣所存上供米毋過百萬石。減直予民。斗錢勿過八十。庚戌韓絳罷。發河北京東兵及監牧卒修都城。丁巳大閱。九月庚申朔王安石無修國史。立武舉絕倫法。冬十月庚寅呂惠卿罷知陳州。乙未彗出軫。己亥詔以災異數見不御前。

殿減常膳。求直言。壬寅赦天下。罷手實法。丁未彗不見。丙辰御殿復膳。十一月戊寅交趾陷欽州。壬午立陝西蕃丁法。甲申交趾陷廉州。丙戌渝州改南平軍。十二月丙申濬河。壬寅以翰林學士元絳參知政事。龍圖閣直學士曾孝寬簽書樞密院事。辛亥天章閣待制趙高為安南道招討使。嘉州防禦使李憲副之。以討交趾。癸丑遼遣耶律世通等來賀。正旦甲寅熙河路木宗域首領結彪謀叛。孰羌日脚族青厮扒斬其首來獻。補下班殿侍。

九年春正月乙丑雨木冰。戊辰交趾陷邕州。蘇



緘死之。已卯下溪州刺史彭師晏及天賜州降。庚辰遣使祭南嶽南海。告以南伐。辛巳贈蘇緘奉國軍節度使。謚忠勇。以其子子元為西頭供奉官。閣門祇候。月戊子宣徽南院使郭達為安南道招討使。罷李憲以趙嵩副之。詔占城占臘合擊交趾。己丑宗哥首領鬼章寇五牟谷。蕃官蘭種訥支等邀擊大破之。己亥以出師罷春宴。乙卯雨雹。三月丙辰朔。進仁宗婉容周氏為賢妃。辛酉御集英殿策進士。恤欽廉邕三州死事家。瘞戰亡士賊所蹂踐。除其田。征甲戌賜進士諸科及第出身五百九十六人。丁丑以廣西進士徐

伯祥為右侍。禁欽廉白州巡檢宗哥首領鬼章寇五牟谷。熙河鈐轄韓存寶敗之。庚辰以种諤知岷州。夏四月辛卯。遼遣耶律庶幾等來賀。同天節。乙未以遼主母喪。罷同天節。上壽。戊戌復廣濟河漕。癸卯詔廣南亡沒士卒及百姓為賊殘破者。轉運安撫司具實并議振恤。以聞。甲辰給空名告身付安南。以招降賞功。詔諸路募武勇赴廣西。贈廣西死事將士官有差。丙午遣王克臣等弔慰于遼。辛亥茂州夷寇邊。遣內副押班王中正經制。甲寅遼遣耶律孝淳以國母喪來告。帝發哀成服。輟視朝七日。五月丙辰朔。詔邕州



沿邊州峒首領來降者周惠之癸亥詔試醫學士丙寅分兩浙為東西路丁卯城茂州壬申詔安南諸軍過嶺有疾者所至護治丙子大理國來貢庚辰靜州下首領董整白等來降六月丁亥詔安南將吏視軍士有疾者月以數聞己丑綿州都監王慶崔昭用劉珪左侍禁張人援戰茂州死之詔慶等子與借職女出嫁夫與奉職白丁王禹錫等二人賜錢其家辛卯詔濱海富民得養蠶戶毋致為外夷所誘己亥慮囚降死罪一等杖以下釋之癸卯以水源等洞蠻主儂賀等七人為定遠寧遠將軍秋七月丙辰朱崖軍黎

賊黃嬰入寇詔廣南西路嚴兵備之庚申關以西蝗蝻蚩蚘生壬戌築下溪州改名會溪城癸亥靜州將楊文緒結蕃部謀叛壬中正斬之以徇詔廣西死事官無子孫者許立後乙丑詔自今遇大禮推恩官昭憲太后族一人是月安南行營次桂州郭達遣鈐轄和斌等督水軍涉海自廣東入諸軍自廣南入八月甲申朔齊州監務左班殿直孫紀死賊錄其一子為三班借職戊子以文彥博守太保兼侍中行太原尹己丑遣程師孟等賀遼主生辰正旦罷鬻祠廟錢丁酉禁北邊民闌出穀粟庚子占城來貢九月戊午濬



汴河丙寅詔罷都大制置河北河防水利司已卯遼遣使回謝詔恤嶺南死事家表將士墓冬十月乙酉太白晝見乙未詔東南諸路教閱新軍丙午王安石罷判江寧府以吳充監修國史王珪為集賢殿大學士並同中書門下平章事資政殿學士馮京知樞密院辛亥除放沅州歸明人戶去年倚閣秋稅十一月乙卯賜廣南東路空名告救募入錢助軍辛酉錄唐相魏徵後同州司士參軍道嚴流內銓特免試注官乙亥以安南行營將士疾疫遣同知太常禮院王存禱南嶽遣中使建祈福道場已卯洮東安撫司言包

順等破鬼章兵於多移谷壬午鬼章寇岷州知州种諤等敗之鐵城十二月丙戌安南偽觀察使劉紀降置司農丞庚寅子傭生丁酉詔岷州界經鬼章兵燹者賜錢脅從來歸者釋其罪癸卯郭逵敗交趾於富良江獲其偽太子洪真李乾德遣人奉表詣軍門降逵遂班師丁未遼遣耶律連等來賀正旦庚戌詔有得鬼章冷鷄朴首者賞之置威戎軍

十年春正月乙丑御宣德門觀燈戊辰仙韶院火不視朝已巳白虹貫日二月甲中以崇信軍節度使宗旦同中書門下平章事戊子以鬼章敗种諤等賞官



有差辛卯日中有黑子甲午詔宗室使相雖及十年  
更不取旨磨勘丁酉詔諸州歲以十一月給老疾貧  
乏者粟盡三月乃止己亥以王韶知洪州丙午以復  
廣源蘇茂等州群臣表賀赦廣州囚罪一等徒以下  
釋之賜行營諸軍錢民緣征役者恤其家以廣源州  
為順州赦李乾德罪以郭逵判潭州趙高知桂州已  
酉以交趾降赦廣南東路荆湖南路繫囚餘各降一  
等徒以下釋之三月辛未慮囚降死罪一等杖以下  
釋之壬申詔州縣捕蝗夏四月辛巳復置憲州乙酉  
遼遣蕭儀等來賀同天節癸巳文州蕃賊寇邊州兵

擊走之丁酉賜熙河路兵特支錢戰死者賜帛免夏  
秋稅五月戊午詔修仁宗英宗史甲戌太白晝見六  
月壬午注輦國朝貢癸巳王安石以使相為集禧觀  
使丁未置岷州鐵城堡秋七月甲寅禱雨丁巳令諸  
路歲上縣令課績辛酉群臣五上尊號曰奉天憲古  
文武仁孝皇帝不許乙亥郭逵以安南失律貶為左  
衛將軍丙子河決澶州曹村埽八月壬寅詔潭州置  
將及增武臣一員遣蘇頌等賀遼主生辰正旦甲辰  
詔侍從臺諫監司各舉文臣有才行者一人九月庚  
戌詔河決害民田所屬州縣䟽濬仍蠲其稅老幼疾



病者振之乙卯詔諸傳宣內批面諭事無法守並從  
中書樞密覆奏其祈恩澤規免罪者劾之辛酉詔鎮  
戎德順軍各置都監一員癸酉立義倉甲戌宗樸兼  
侍中封濮陽郡王冬十月戊寅朔宗樸薨癸巳昭化  
軍節度使宗誼封濮國公詔濮王子以次襲封奉祀  
戊戌太子太師張昇卒十一月庚午以西蕃邈川首  
領董璪都首領青宜結鬼章為廓州刺史阿令骨為  
松州刺史甲戌祀天地于圜丘赦天下十二月丁丑  
朔占城國獻馴象壬午詔改明年為元豐甲申以郊  
祀文武官加恩丁亥封子傭為均國公辛丑遼遣耶  
律孝淳等來賀正旦

元豐元年春正月乙卯以王安石為尚書左僕射舒  
國公集禧觀使戊午命詳定郊廟禮儀詔減陳留捧  
日天武等軍剩員庚申御宣德門召從臣觀燈乙丑  
以太皇太后疾驛召天下醫者閏月辛巳以翰林侍  
讀學士寶文閣學士提點中太一宮呂公著兼端明  
殿學士已丑詔贈尚書令韓琦依趙普故事壬辰樞  
密直學士孫固同知樞密院事已亥太傅兼侍中曾  
公亮薨庚子日中有黑子癸卯以公亮配饗英宗廟  
庭二月庚戌濮國公宗誼薨甲寅以邕州觀察使宗



暉為淮康軍節度使封濮國公戊辰詔赦安南戰棹  
 都監楊從先等仍論功行賞三月辛巳慮囚降死罪  
 一等杖以下釋之御邇英閣沈季長進講周禮八法  
 癸未詔内外文武官各舉堪應武舉一人廣南西路  
 經略司乞教閱峒丁從之乙未御崇政殿閱諸軍辰  
 沅徭賊寇邊州兵擊走之夏四月巳酉遼遣耶律永  
 寧等來賀同天節丙辰詔增置兩浙路提舉官庚申  
 詔除九經外餘書不得出界癸亥太白晝見乙丑封  
 號國公宗諤為豫章郡王戊辰塞曹村決河名其埽  
 曰靈平五月甲戌朔賜塞河役死家錢乙亥詔試中

刑法官以次推恩六月癸卯朔日有食之乙巳詔以  
 靈平功遷太常博士苗師中等各一官秋七月癸酉  
 朔命西上閣門使忠州團練使韓存寶經制瀘州納  
 溪夷巳亥詔齊州預備水災辛丑夔州言甘露降八  
 月癸卯西邊將訥兒温祿尊謀反伏誅丁未詔河北  
 被水者蠲其租甲寅遣黃履等賀遼主生辰正日戊  
 午以韓絳為建雄軍節度使巳巳詔濱棣滄三州被  
 水民以常平糧貸之庚午詔青齊淄三州給流民食  
 九月癸酉交趾來貢癸未李乾德表乞還廣源等州  
 詔不許乙酉以端明殿學士呂公著樞密直學士薛



向並同知樞密院事詔祀天地及配帝並用特牲是  
月武康軍嘉禾生河中府甘露降冬十月庚戌定秋  
試諸軍賞格侍禁件全死事錄其弟宣為三班借職  
辛亥韓存寶破瀘夷後城十有三圍癸亥于闐來貢  
十一月己丑命龍圖閣直學士宋敏求等詳定正旦  
御殿儀注癸巳辰州徭賊叛詔沅州兵討之己亥罷  
文武功臣號是月梁縣嘉禾生十二月丙午日中有  
黑子凡十二日辛亥錄囚降死罪一等杖以下釋之  
丙辰詔青州民王贊以復父讐免死刺配鄰州戊午  
置大理寺獄己未詔罷都大提舉在京諸司庫務司

甲子以婉儀邢氏為賢妃詔罷三司推勘公事官減  
軍器監勾當公事審官東院流內銓及將作監三班  
院主簿左右軍巡判官丙寅遼遣耶律隆等來賀正  
旦

二年春正月乙亥罷岢嵐火山軍市馬丙子詔立高  
麗交易法壬午以容州管內觀察使上柱國南陽郡  
開國公楊遂為寧遠軍節度使癸未詔知沅州謝麟  
督捕徭賊甲申御宣德門觀燈丁亥詔以經義論試  
宗室甲午京兆府學教授蔣夔乞以十哲從祀孔子  
從之詔辰州叙浦縣置龍潭堡是月潁州壽州甘露



降二月甲寅詔瘞漢州暴骸日中有黑子乙卯以瀘  
州夷乞第犯邊詔王光祖等討之丙辰詔定解鹽歲  
額乙丑滄州饑發倉粟振之三月庚午朔董璠遣使  
來貢辛未詔給地葬畿內寄菽之喪無所歸者官瘞  
之庚辰親試禮部進士壬午試特奏名進士及武舉  
癸未試諸科明法賜董璠緡錢銀帛對衣金帶等物  
丙戌詔雒州兩輸戶南徙者諭令復業庚寅疏汴洛  
夏四月辛丑幸金明池觀水嬉宴射瓊林苑甲辰遼  
遣蕭晟等來賀同天節丁巳陳升之以檢校太尉依  
前同中書門下平章事鎮江軍節度使上柱國秀國  
公致仕己未陳升之卒癸亥定正旦御殿儀甲子詔  
增審刑院詳議詳斷官罷刑部檢法官是月南康軍  
甘露降眉州生瑞竹五月丙子順州蠻叛峒兵討平  
之庚辰詔以濮安懿王三夫人並稱王夫人祔濮園  
辛巳太子太師致仕趙槩上所集諫林中申元絳罷  
知亳州乙酉詔安南軍死事孤寡廩給之戊子御史  
中丞蔡確參知政事六月甲辰廣西捕斬農智春執  
其妻子以獻戊申命蔡確參定編修傳法寶錄癸丑  
詔五路帥臣副總管軍臣僚各舉任將領及大使臣  
者二人甲寅清汴成辛酉詔鎮寧軍節度使魏國公



宗懿追封舒王是月南康軍甘露降忠州雨豆秋七月甲戌張方平以太子少師致仕戊寅詳定朝會議已卯會中書旬攷四方詔獄庚辰以淮康軍節度使宗暉同中書門下平章事丁亥詳定郊廟禮儀是月陳州芝草生南賓縣雨豆瓊州甘露降八月丙申朔夏人寇綏德城都監李浦敗之辛丑分涇原路兵馬十一將壬寅復入作司為東西兩司各置監官文武一員武臣二員遣李清臣等賀遼主生辰正旦甲寅詔增太學生舍為八十齋齋三十人外舍生二千人內舍生三百人月一私試歲一公試補內舍生間歲

一舍試補上舍生以潁州為順昌軍節度是月曹州生端穀河陽生芝草九月癸未降順昌軍囚罪一等徒以下釋之甲申西南龍蕃來貢丁亥大宴集英殿已丑進婕妤朱氏為昭容壬辰出馬步射格鬪法頒諸軍甲午西南羅蕃方蕃來貢冬十月丙申西南石蕃來貢癸卯置藉田令詔立水碓船戶五戶至十戶為一甲戊申交趾歸所掠民詔以順州賜之己酉太皇太后疾上不視事庚戌罷朝謁景靈宮命輔臣禱于天地宗廟社稷減天下囚死罪一等流以下釋之乙卯太皇太后崩戊午詔易太皇大皇園陵曰山陵



辛酉以群臣七上表始聽政命王珪為山陵使十一月癸未始御崇政殿丁亥雨土十二月乙巳御史中丞李定上國子監敕式令并學令凡百四十條丙午復置御史六察庚申遼遣蕭寧等來賀正旦是月全州芝草生桂州甘露降

本紀卷第十五

本紀卷第十六

宋史十六

開府儀同三司程錄國重事善書耆翁穆賢更領筵事都總裁管脫脫等奉勅修

神宗三

三年春三月乙丑朔以大行太皇太后在殯不視朝癸酉陞許州為穎昌府丙子降穎昌囚罪一等徒以下釋之戊寅上太皇太后謚曰慈聖光獻戊子詔審刑院刑部斷議官失入者歲具數罰之己丑高麗國遣使來貢白虹貫日辛卯于闐國大首領阿令顛顛溫等來貢癸巳白虹貫日二月丙午以翰林學士章



惇參知政事丙辰始御崇政殿視朝丁巳命輔臣禱  
雨三月乙丑工部侍郎同平章事吳充罷爲觀文殿  
大學士西太一宮使癸酉葬慈聖光獻皇后于永昭  
陵丙子南丹州入貢以刺史印賜之乙酉祔慈聖光  
獻皇后神主于太廟戊子降兩京河陽囚罪一等民  
緣山陵役者蠲其賦己丑以慈聖光獻皇后弟昭德  
軍節度使曹佾爲司徒兼中書侍郎護國軍節度使  
餘親屬加恩有差夏四月乙未觀文殿大學士吳充  
薨丁酉封宗暉爲濮陽郡王濮安懿王子孫皆進官  
一等己亥遼遣耶律永芳等來賀同天節乙巳以瀘

州夷乞弟侵擾詔邊將討之戊申乞弟寇戎州兵官  
王宣等戰歿甲寅罷羣牧行司復置提舉買馬監牧  
司乙卯令御史分案諸路監司庚申詔御史臺六察  
以糾劾多寡爲殿最任滿取旨升黜辛酉增國子監  
歲賜錢六千緡五月乙丑詔自今三伏內五日一御  
前殿辛巳以賴昌進士劉堂上制盜十策授徐州蕭  
縣尉甲申復命韓存寶經制瀘夷詔改都大提舉導  
洛通汴司爲都提舉汴河提岸司是月青州臨朐益  
都石化爲麩六月甲午日有五色雲戊戌詔省宗室  
教授存十三員丙午詔中書詳定官制罷兵部勾當



公事官詔河北河東陝西路各選文武官一員提舉  
義勇保甲壬子詔罷中書門下省主判官歸其事于  
中書是月安州臨江軍產芝及連理麥秋七月庚午  
河決澶州甲戌詔自今遇大禮罷上尊號癸未彗出  
太微垣丙戌避殿減膳詔求直言丁亥罷羣神從祀  
明堂戊子太白晝見八月乙巳罷省寺監官領空名  
者癸丑遣王存等賀遼主生辰正旦戊午彗不見九  
月壬戌增宣祖定州東安墳地二十頃及守園戶丙  
寅御殿復膳乙亥正官名以開府儀同三司易中書  
令侍中同平章事特進易左右僕射自是以下至承  
務郎易秘書省校書郎正字將作監主簿有差檢校  
僕射以下及階散憲銜並罷詳在職官志辛巳大饗  
明堂以英宗配赦天下癸未薛向孫固並為樞密副使  
乙酉詔卽景靈宮作十一殿以時工禮祀祖宗以王安石  
為特進改封荆國公丙戌進封岐王顥封雍王嘉王越王  
曹王並為司空文彥博為太尉封曹佺為濟陽郡王宗旦  
為華陰郡王馮京為樞密使薛向罷知潁州丁亥以  
呂公著為樞密副使閏九月乙卯加文彥博河東永興軍  
節度使以富弼為司徒十一月己丑朔日當食雲陰  
不見十二月甲辰遼遣蕭保等來賀正旦



四年春正月乙未命步軍都虞候林廣代韓存寶經制瀘夷庚子詔試進士加律義辛亥于闐來貢馮京罷知河陽孫固知樞密院監圖閣直學士韓縝同知樞密院事二月辛未置秦州鑄錢監監已卯分東西團結諸軍為十三將三月乙未詔在京官毋舉辟執政有服親癸卯章惇罷知蔡州甲辰以翰林學士張璪參知政事乙巳命官閱九軍營陳法監京城南戊申大閱丙辰董氈遣使來貢夏四月癸亥遣耶律祐等來賀同天節御延和殿閣試保甲已巳詔監南郊合祭天地自今親祀北郊如南郊儀有故不行則以上公攝事壬申慮囚山陰

縣主簿余行之謀反伏誅乙酉河決澶州小吳埽五月丁酉詔河東路提點刑獄劉定專振被水民戊申封晉程嬰為成信侯公孫杵臼為忠智侯立廟于絳州六月戊午河北諸郡蝗生癸未命提點開封府界諸縣公事楊景略提舉開封府田司常平等事王得臣督諸縣捕蝗秋七月已丑太白晝見庚寅西邊守臣言夏人囚其主乘常詔陝西河東路討之甲午鄜延涇原環慶熙河麟府路各賜金銀帶綿襖銀器鞍轡象笏甲辰韓存寶坐逗遛無功伏誅丁未大軍進攻米脂砦已酉詔曾鞏充史館脩撰專典史事詔內外官司舉官



悉罷令大理卿崔台符同尚書吏部審官東西三班院議選格八月乙卯朔罷中書堂選悉歸有司丙辰詔蠲河北東路災傷州軍今年夏料役錢辛酉夏人寇臨州堡詔董璫會兵伐之以金州刺史燕達為武康軍節度使己巳復置滑州丁丑熙河經制李憲敗夏人于西市新城獲酋首三人首領二十餘人庚辰又襲破于女遮谷斬獲甚衆辛巳司馬光趙彥若上所修百官公卿年表十卷宗室世表三卷九月乙酉董璫遣使來貢且言己遣首領洛施軍篤喬阿公等將兵三萬會擊夏國李憲復蘭州古城戊子蘭州新

順首領巴令謁等三族率所部兵攻夏人撒逋宗城敗之己亥王珪上國朝會要壬寅閱河北保甲于崇政殿官其優者三十六人甲辰詳定郊廟奉祀禮儀丙午詔諭夏主左右并鬼名部族諸部首領並許自歸戊申太白犯斗庚戌夏兵救米脂砦鄜延經略副使种諤率衆擊破之辛亥种諤又敗夏人于無定川十月丁巳米脂砦降己未拂菻國來貢庚申熙河兵至女遮谷與夏人遇戰敗之乙丑涇原兵至磨哆隘遇夏人與其統軍梁大玉戰敗之追奔二十里斬大首領沒囉卧沙監軍使梁格鬼等十五級獲首領統



軍姪訖多埋等二十二人已巳入銀州庚午環慶行  
營經略使高遵裕復通遠軍种諤遣曲珍等領兵通  
黑水安定堡路遇夏人與戰破之斬獲甚衆癸酉復  
韋州乙亥李憲敗夏人于屈吳山丁丑曲珍與夏人  
戰于蒲桃山敗之戊寅种諤入貢州詔諸將存撫降  
人辛巳史館修撰曾鞏乞收采名臣高士事迹遺文  
詔從之涇原節制王中正入宥州十一月癸未朔日  
有食之丁亥諸軍合攻靈州种諤敗夏人于黑水已  
丑李憲敗夏人于囉逋川辛卯种諤降橫河平人戶  
破石堡城斬獲甚衆辛丑師還癸卯种諤至夏州索

家平兵衆三萬人以無食而潰丙午高遵裕以師還  
夏人來追遂潰十二月辛未林廣破乞弟于納江乙  
亥慈聖光獻皇后禫祭宰臣王珪等上表請聽樂不  
許自是五表乃從之戊寅遼遣蕭福全等來賀正且  
五年春正月癸未朔不受朝丙申御宣德門觀燈已  
亥白虹貫日庚子責授高遵裕郢州團練副使本州  
安置乙巳作新渾儀浮漏辛亥詔再議西討以熙河  
經制李憲為涇原熙河蘭會安撫制置使李浩權安  
撫副使二月癸丑朔頒三省樞密六曹條制詔郵延  
軍士病不能歸者賜其家絹十匹丙辰以乞弟平班



師辛酉詔董璘首領結隣死者朝辭物給其子董訥  
支蘭璘增賜絹百匹癸亥華陰郡王宗旦薨丁卯封  
武昌軍節度觀察留後宗惠為江夏郡王癸酉以出  
師赦梓州路減囚罪一等民緣軍事役者蠲其賦封  
董璘為武威郡王丙子渤泥來貢三月壬辰親策進  
士甲午策武舉己亥以日當食避殿減膳赦天下降  
死罪一等流以下原之詔杭州歲修吳越王墳廟壬  
寅鄜延路副總管曲珍敗夏人于金湯乙巳賜進士  
諸科出身千四百二十八人丙午雨土夏四月壬子  
朔日食不見甲寅御殿復膳丁巳遼遣耶律永端等

來賀同天節己未沈括奏遣曲珍將兵綏德城應援  
討葭蘆塞左右見聚羌落詔從之乙丑以直龍圖閣  
徐禧知制誥權御史中丞癸酉官制成以王珪為尚  
書左僕射兼門下侍郎蔡確為尚書右僕射兼中書  
侍郎甲戌太中大夫章惇為門下侍郎張璪為中書  
侍郎翰林學士蒲宗孟為尚書左丞翰林學士王安  
禮為尚書右丞錄唐段秀實後復其家丁丑同知樞  
密院呂公著罷知定州五月辛巳朔行官制丁亥賞  
平蠻將士有差癸巳豐州卒張世矩等作亂伏誅其  
黨王安以母老詔特原之作尚書省戊戌詔兩省官



人舉可任御史者各二人甲辰遣給事中徐禧治鄜  
延邊事六月辛亥朔環慶經略司遣將與夏人戰破  
之斬其統軍嵬名妹精嵬副統軍訛勃遇甲寅王珪  
上兩朝史戊午詔修兩朝寶訓詔以成都路供給瀘  
州邊事曲赦免二統甲子改翰林醫官院為醫官局  
壬申交趾獻馴犀二癸酉豫章郡王宗諤薨戊寅曲  
珍等敗夏人于明堂川作天源河秋七月辛巳廣西  
經略司言知宜州王竒與賊戰敗績壬午詔罷大理  
寺官赴中書省讞案戊子詔御史中丞舒亶舉任言  
事或察官十人辛卯詔尚書考功員外郎蔡京編手

詔庚子以蔡京為起居郎仍同詳定官制丁未垂拱  
殿宴修史官巳酉始建雩壇祀上帝以太宗配八月  
庚戌朔封御侍武氏為才人壬子進封均國公傭為  
延安郡王以昭容朱氏為賢妃庚申帝有疾詔歲以  
四孟月朝獻景靈宮辛未遣韓忠彥等賀遼主生辰  
正旦鳳州團練使种諤以行軍迂道降授文州刺史  
壬申詔罷增減幕職州縣官奉甲戌城永樂戊寅河  
決原武九月丁亥夏人三十萬衆寇永樂曲珍戰不  
利裨將寇偉等死之夏人遂圍城巳丑帝以疾愈降  
京畿囚罪一等徒以下釋之壬辰遣使行視畿縣民



被水患者乙未詔張世矩等將兵救永樂砦戊戌永樂陷給事中徐禧內侍李舜舉陝西轉運判官李稷死之。己亥詔客省引進四方館東西上閣門各置使副等職庚子安化蠻寇宜州知州王竒死之。詔贈忠州防禦使。辛丑賞董璘將士有差癸卯滑州河水溢冬十月辛亥洛口廣武大河溢甲寅知延州沈括以措置垂方責授均州團練副使隨州安置鄜延路副都總管曲珍以城陷敗走降授皇城使丙辰脩定景靈宮儀乙丑詔贈永樂死事臣徐禧金紫光祿大夫吏部尚書李舜舉昭化軍節度使並賜謚忠愍李稷

朝奉大夫工部侍郎入內高品張禹勤皇城使各推恩賜贈有差。癸酉貶知太原府資政殿大學士呂惠卿知單州十一月戊寅朔罷御史察諸路壬午景靈宮成告遷祖宗神御癸未初行酌獻禮乙酉以奉安神御赦天下官與享大臣子若孫一人庚寅紫宸殿宴侍祠官十二月丁巳新樂成以賢妃周氏為德妃辛酉塞原武決河丙寅休日御延和殿引進對官十人辛未西南龍蕃來貢壬申遼遣耶律儀等來賀正旦丙子錄永樂死事將皇城使寇偉等十三人及東上閣門副使景思誼等九十人贈賜有差。



六年春正月丁丑朔御大慶殿受朝始用新樂儀鸞  
 司徹幕屋壞毀王輅甲申白虹貫日丁亥朝獻景靈  
 宮己丑層檀全貢庚寅御宣德門觀燈癸巳詔御史  
 六察罷上下半年更易法乙未詔修周漢以來陵廟  
 乙巳御崇政殿閱武士丙午封楚三閭大夫屈平為  
 忠潔侯二月丁未夏人數十萬衆攻蘭州鈐轄王文  
 郁率死士七百餘人擊走之丙辰以夏人犯蘭州貶  
 熙河經略使李憲為經略安撫都總管以王文郁為  
 西上閣門使知蘭州副使李浩為四方館使甲子詔  
 供備庫使高遵治西京左藏庫副使張壽各降一官

三月辛卯夏人寇蘭州副總管李浩以衛城有功復  
 隴州團練使乙未休日御延和殿引進對官八人丙  
 申河東將薛義敗夏人于葭蘆西嶺戊戌以檢校太  
 尉上柱國太原郡開國公王拱辰為武安軍節度使  
 麟府州將郭忠詔等敗夏人于也離抑部詔行賞有  
 差己亥河東將高永翼敗夏人于真卿流部夏四月  
 己酉朝獻景靈宮辛亥遼遣蕭固等來賀同天節甲  
 子禮部郎中林希上兩朝寶訓李浩敗夏人于巴義  
 谿辛未兩土壬申御邇英閣蔡卞進講周禮五月丙  
 子朔于闐入貢甲申以時暑趣決開封大理獄庚寅



以旱慮囚甲午夏人寇蘭州右侍禁韋定死之。癸卯  
詔賜資州孝子支漸粟帛。是月夏人寇麟州知州訾  
虎敗之。六月乙巳朔詔御史臺六察各置御史一員  
癸丑詔御史中丞兩省官各舉可任言事或監察御  
史五人。閏月乙亥朔夏主秉常請修貢許之。戊寅詔  
陝西河東毋輒出兵丙戌詔内外文武各舉應武舉  
一人。汴水溢丙申太師守司徒韓國公富弼薨。謚文  
忠。秋七月乙卯祔孝惠孝章淑德章懷皇后于廟丙  
辰以四后祔廟降京畿囚罪一等流以下原之孫固  
罷知河陽以同知樞密院韓縝知樞密院戶部尚書

安燾同知樞密院戊午朝獻景靈宮八月丙子賜升  
祔陪祠官宴于尚書省己卯太白晝見乙酉遣蔡京  
等賀遼主生辰正旦辛卯蒲宗孟罷王安禮為尚書  
左丞吏部尚書李清臣為尚書右丞九月癸卯朔日  
有食之冬十月癸酉朔秉常遣使上表請復修職貢  
乞還舊疆戊子封孟軻為鄒國公。癸巳會稽郡王世  
清薨庚子尚書省成辛丑封馬援為忠顯王。十一月  
癸卯加上仁宗謚曰體天法道極功全德神文聖武  
睿哲明孝皇帝英宗曰體乾應曆隆功盛德憲文肅  
武睿神宣孝皇帝甲辰朝獻景靈宮乙巳朝享太廟



丙午祀昊上帝于園丘赦天下甲寅文彥博以太師致仕乙卯以觀文殿大學士韓絳為建雄軍節度使庚申幸尚書省官執政五服內未仕者一人進尚書以下官一等

七年春正月丙午封洛州防禦使世準為安定郡王癸丑夏人寇蘭州李憲等擊走之甲寅以賢妃朱氏為德妃二月甲戌太師文彥博入覲置酒垂拱殿癸未進封濮陽郡王宗暉為嗣濮王封宗晟為高密郡王宗綽為建安郡王宗隱為安康郡王宗瑗為漢東郡王宗愈為華原郡王三月辛丑賜文彥博宴于瓊

林苑帝製詩以賜之庚申御崇政殿大閱壬戌詔賜鬼章寫經紙還其所獻馬癸亥白虹貫日夏四月辛未大食國來貢乙亥遼遣蕭浹等來賀同天節丁丑賜饒州童子朱天錫五經出身丙戌景靈宮天元殿門生芝草六本壬辰朝獻景靈宮癸巳夏人寇延州安塞堡將官呂真敗之五月壬子慮囚降死罪一等杖以下釋之辛酉白虹貫日壬戌以孟軻配食文宣王封荀况楊雄韓愈為伯並從祀詔諸路帥臣監司等舉大使臣為將領六月丙子夏人寇德順軍巡檢王友死之辛卯江夏郡王宗惠薨秋七月甲辰伊洛



溢河決元城丙午遣使振恤賜溺死者家錢壬子朝  
獻景靈宮甲寅王安禮罷八月庚午詔王光祖遣人  
招諭乞弟許出降免罪補官是歲乞弟死辛巳遣陳  
睦等賀遼主生辰正旦九月壬寅西南龍蕃來貢乙  
巳三佛齊來貢乙丑夏人圍定西城熙河將秦貴敗  
之冬十月乙亥夏人寇熙河庚辰饒州童子朱天申  
對于睿思殿賜五經出身辛巳朝獻景靈宮戊子詔  
分畫交趾界以六縣二峒賜之乙未夏人寇靜邊砦  
涇原將彭孫敗之十一月丁酉朔寇清邊砦隊將白  
玉李貴死之甲辰夏國主秉常遣使來貢乙卯太白

晝見十二月戊辰端明殿學士司馬光上資治通鑑  
以光爲資政殿學士降詔獎諭庚寅詔門下中書外  
省官同舉言事御史辛卯遼遣耶律襄等來賀正旦  
是歲河東饑河北水壞洺州廬舍蠲其稅

八年春正月戊戌帝不豫甲辰赦天下乙巳命輔臣  
代禱景靈宮乙卯分遣羣臣禱于天地宗廟社稷二  
月辛巳開寶寺貢院火丁亥命禮部鎖試別所癸巳  
上疾甚遷御福寧殿三省樞密院入見請立皇太子  
及請皇太后權同聽政許之三月甲午朔立延安郡  
王傭爲皇太子賜名煦皇太后權同處分軍國事乙



宋史本紀卷第十六 十三 三皇  
未赦天下遣官告于天地宗廟社稷諸陵丁酉皇太后命吏部尚書曾孝寬爲冊立皇太子禮儀使戊戌上崩于福寧殿年三十有八皇太子卽皇帝位尊皇太后爲太皇太后皇后爲皇太后德妃朱氏爲皇太妃太皇太后權同處分軍國事九月己亥上大行皇帝謚曰英文烈武聖孝皇帝廟號神宗十月乙酉葬于永裕陵

贊曰帝天性孝友其入事兩宮必侍立終日雖寒暑不變嘗與嘉岐二王讀書東宮侍講王陶講論經史輒相率拜之由是中外翕然稱賢其卽位也小心謙抑敬畏輔相求直言察民隱恤孤獨養耆老振匱乏不治宮室不事遊幸厲精圖治將大有爲未幾王安石入相安石爲人悻悻自信知祖宗志吞幽薊靈武而數敗兵帝奮然將雪數世之耻未有所當遂以偏見曲學起而乘之青苗保甲均輸市易水利之法旣立而天下洶洶騷動慟哭流涕者接踵而至帝終不覺悟方斷然廢逐元老擯斥諫士行之不疑卒致祖宗之良法美意變壞幾盡自是邪佞日進人心日離禍亂日起惜哉







